




廣州府志

ル 5
1212
30





門 凡 58
號 1212
卷 30



廣州府志卷七十九

前事畧五

明

神宗萬曆元年秋七月順德大水傷稼順德志

新會新甯大有年新會新甯志

廣東以軍興故增民間稅至萬曆初亂定戶科給事中李戴

奏平之明史李戴傳

二年秋八月十六日迅雷暴風拔木增城志

五年秋七月順德飛蝗食苗盡順德志

南海地震南海志

九月二十三日申時彗星見於西方尾光芒五六尺白氣如

練沖天至冬十一月乃滅順德志

六年夏五月龍津堡居民歐珍家產靈芝二本明年己卯夏

四月復產一本順德志

提督凌雲翼捕斬大廟諸山賊凌雲翼傳

冬新會雨雪新會志

八年老萬山賊肆劫海防同知周希尹遣兵平之新安志

先嘉靖己巳賊據老萬山為害備倭指揮孫敖以海道林

懋舉命征之遁去復聚劫掠船隻海防同知周希尹遣兵

討之破其穴而還新安志

九月彗星見於西方香山志

九年五月從化增城龍門溪壑泛漲田禾盡沒淦死男婦無

算明史五

冬行清丈法郭通志

十年火燬歸德門城圈番禺志

十一年二月雨雹南海志

三水地震三水志

夏秋新安大旱新安志

十二年番禺三水順德新會香山地地震番禺三水香山順德新會志

夏三水大水三水志

秋七月朔順德香山新會地復震順德新會香山志

十三年夏四月香山旱香山志

九月香山大水香山志

十四年夏廣東大水明史五行志

六月南海民龐守伸妻一產三男縣月給米一石南海志

南海順德兩豆無皮南海志

東莞大饑東莞志

十七年夏五月增城大水增城志

十八年順德小灣產大豬順德志

東莞黑青見東莞志

東莞大饑東莞志

十九年三水獄疫三水志

三水大旱三水志

先是獄疫知縣甘□□躬省獄命役潔其寢處焚香木而

圍土無恙及早祈於城隍三日不雨自繫以禱須臾滂沱

四遍人以爲甘霖三水志

二十年春夏大水三水志

胥蠶賊除三水志

時胥蠶麥孔陽等夜則十蠶啣尾夾以長桅遠望如長船

衆力操之其捷如飛遇貨艘往來無不得者殺人石沉深

潭中尋解連復爲小蠶又爲奔報哨守狀官兵無從緝賊

如是不知幾何年知縣甘廉得之適有來告失財命於江

次者問其地卽此也遂密捕其蠶鞫招押以覓屍日以石

沉之潭中無能覓矣押指其地召没人撈骨没人入輒如

風雷迷瞶恐懼而出云骨多但持不能出甘乃焚香告天

召没人硃批其手曰取骨伸冤遂没人抱而出賊胥自此

遂除三水志

二十一年巡按廣東御史王有功禁治閩商私糴郭通志

閩商白艚至廣輒多買米以私各島牙戶利其重貨相與

爲奸米價輒騰民譁有功治商逐艚民乃定郝通志

七月香山雨雹如石壞屋宇香山志

二十三年夏六月三水大水三水志

秋三水大旱三水志

南海民產子無首兩目著胸間南海志

二十四年春夏順德大旱順德志

歲大饑三水志

秋七月南海雨豆南海志

八月二十夜清遠地震二十三夜復震二十九黎明又震清遠志

謹按南海志云地震凡三疑與此同一事新會亦云

地震

二十五年三月新會大雨雹新會志

順德大水傷稼復饑順德志

秋三水大旱三水志

新安黑雉見新安志

二十七年元旦雷鳴南海志

四月稅課使李鳳至粵郝通志

有言粵中稅課方物權之可增額二十萬及鳳至不能充

郝通額志

董應舉閩縣人爲廣州教授與稅監李鳳爭學旁墻地鳳舍人馳騎文廟前繫其馬用是有名遷南京國子博士董應

舉傳

二十八年春從化黑雉見從化志

夏四月廣東新會在籍通判吳應鴻舉人勞養魁鍾聲朝梁

斗輝皆幽繫詔獄應鴻斃獄中

明史華鈺傳

鳳陰籍富人懦弱者中以匿稅法新會令鈕應魁媚事鳳繫良民四十餘家在籍通判吳應鴻以羣情洵恐生它變偕舉人梁斗輝勞養魁鍾應期謁鈕言狀鈕拂然入逼勒愈急民數千充牣縣庭哀鳴踊哭鈕索械召兵一時奔逸爭門蹂踐死者五十一人鈕懼求解於應鴻辭不能遂潛於鳳以撓稅馳疏緹騎立至逮應鴻等下詔獄工部給事中王德完特具疏救不報

鶴山志

應魁賄權監誣奏謂應鴻等倡亂有詔逮繫入京逮之日士夫哭於家百姓號於市當道無不切齒應魁者惟方伯山陰王泮力護之既至下詔獄時巡按御史李時華及諸臺諫咸為應鴻等訟冤工科給事中王德完特具疏救大學士沈一貫朱賡又具疏謁請未幾應鴻瘐死獄中

新會志

御史李時華亦言近日所逮吳應鴻勞養魁等俱宜赦下撫按勘虛實不得以一人單詞害良善不報

華鈺傳

王德完為吳應鴻勞養魁訟冤疏臣惟廣東新會民變前已奉旨逮繫提問有差彼時臣未習粵事何敢妄言繼詢粵中來者皆云粵士何罪罪在縣官臣猶遲疑未信頃接廣東院司考語文冊內開新會知縣鈕應魁惟急羨餘常例不知束隸保民中使差官捉拿富戶多人極刑拷掠士民方切病痛父母之呼本官漫為秦越肥瘠之視以至百姓積怨生仇積仇生亂始則擁眾堂皇蹂踐而死者五十人既乃闖入衙舍狂瞽而罵者兩晝夜決百年紀法之防駭四方眾庶之聽禍本雖由中使激變實在縣官尤可

恨者既懼中使之勢而莫敢誰何復假中使之威而因以爲市蔓延士類速繫無辜誰爲厲階殊可切齒臣讀罷不覺髮上指冠恨不手刃以復匹夫匹婦之仇以洩四方四民之忿臣殆不能緘默無言矣夫守令何官親民之官也守令何任保民之任也當鷹鷂搏擊惟父母爲之救援盜賊猖狂賴乳保爲之捍蔽今應魁未事而漁獵於先因事而箠楚於後不消弭於衆怒水火之日顧請剿於黎民糜爛之秋畏威附勢正名教所不容乘變劫財尤犬豕所不食殘民之惡已稔誣士之禍尤深訪得舉人勞養魁於萬曆二十七年十二月往省城娶婦離家計五閱月離縣計四百里通判吳應鴻新以憂制回籍舉人鍾聲朝梁斗輝又皆窮約杜門激變緣由毫無干涉查該縣初詳撫按司

道則曰官差陳保流殃惡棍林權撥置再申則曰生員七人主盟亂民劉七星等鼓譟並無養魁四人名姓查稅監李鳳知縣手本亦曰拘犯李芸易十二名被生員聚譟與陳保揭報相同亦無養魁等四人名姓彌天巨網何故突入其中臣猶恐文揭難憑乃齎檄守道李同芳親至新會定亂廣詢士民訪求首惡絕無養魁四人細求其故僉謂養魁之父以鹽事激怒縣官訟在臬司未結向欲以奇禍中之又該縣自知傷死人衆民怨莫解託縣丞蔡道全登鄉官舉人之門求爲勸和而應鴻斗輝聲朝以衆怒難平不果出遂銜之初欲倩人解脫繼乃詭揭中傷不惟殘害百姓仍且煽禍縉紳此宜提問重究以警海內者也

謹案鶴山志應鴻瘕斃後其子伏闕陳情太常郭尙

阮通志

賓侍御吳其貴等相繼疏請神宗悔悟詔贈應鴻尙
寶寺卿舉人梁斗輝等皆準會試就選又按新會舊
志及鶴山志鍾聲朝俱作鍾應期當從明史爲是王
德完疏明史不載故具錄於此

八月南海地震南海志

二十九年春禁里甲郝通志

巡按都御史李時華革五弊一曰飭條鞭以甦里甲二曰
懲加耗以清貪黷三曰止派夫以節疲困四曰立和買以
寬鋪行五曰驅白艚以防接濟南海府志

三十一年秋八月二十二日新安地震新安志

三十二年夏五月三水大水三水志

三十三年夏五月南海順德大水南海順德志

秋八月初三日新安地震新安志

南海夏秋冬地震凡八南海志

按新會志是年五月六月七月八月十一月地震凡
五次

十一月傳聞澳夷與倭合謀犯省檄下修城凡民居附者拆
毀務盡四丈爲界南海知縣劉廷元力言於上許以離城二
丈爲界存者殆半南海志

三十四年甘竹中灘潭鯉化龍順德志

新會三水地震新會三水志

東莞大水東莞志

三十五年三月十一日順德地震順德志

夏四月初五日禺峽山龍起雷雨大作諸峯多崩裂清遠志

三水大水三水志

冬十一月甘露降增城從化增城志 從化志

賊掠西南三水志

時突有山寇數百掠西南鄉民敵殺十數人獲其魁號白

曰平三水志

三十六年三水地震三水志

三十七年秋七月大水南海志

先數日炎氣如蒸薄暝赤雲湧空未幾驟雨傾盆雷擊郡

學文廟次日申時雨止壞城內房屋特多南海志

三十八年夏六月三水大水三水志

十一月新會大風雨雪大如粟新會志

三十九年五月廣東大水神宗紀

三水笏竹花而實三水志

南海地震南海志

四十年秋三水大水三水志

南海地震南海志

新會竹有花新會志

四十一年夏三水大水三水志

四十二年兩廣俱水明史五行志

十二月南海地震南海志

四十三年夏三水大水三水志

四十四年七月廣東水神宗紀

巡撫周嘉謨巡按田生金疏請蠲免有差三水志

四十五年廣東災神宗紀

冬十一月從化地震從化志

四十六年二月賑廣東饑神宗紀

東莞增城地震東莞增城志

六月五色雲見於香山小欖香山志

冬十二月從化雪三日從化志

時近陰寒甚雪晝下如珠次日如鵝毛六日至八日乃已山谷之中峯盡壁立林皆瓊挺父老俱言從來未有也自是連歲大稔從化志

四十七年春三月從化雨雹從化志

四十八年正月廣東龍門祥雲見五行志

夏六月十七日新安地震新安志

光宗泰昌元年東莞大饑東莞志

熹宗天啟元年東莞新甯地震東莞新甯志

新會大有年新會志

三年紅毛夷闖入新安由佛堂門入泊庵下知縣陶學修親率鄉兵持兵器往谿西等處防守乃去新安志

秋九月香山獲白鹿香山志

知縣周維持範銀為牌銘曰國家禎祥命獵人畜之大麓

香山志

冬十月從化上下山盜大起從化志

上山賊首賴丁髻廖大鼻張惟冲等據蘭和白牛溪頭等崗嘯聚二千餘人而下山賊首鍾國讓增城賊首賴鷄二亦各聚眾千餘四出流劫鄉村無不殘破增從清龍英甯六邑悉被其害男婦殺擄勒贖者不可計數其釀禍實始

於龍門之開鐵爐及奸民之燒炭者非一朝一夕云從化志

十一月增城賊首賴雞二侵從化知縣雷恒率眾擒之從化志

雞二本增城良家子習於無賴遂為盜剽掠甚熾至是因

劫高布村不利率其黨欲與下山盜合掠境而行知縣雷

恒獎勵民兵歐陽周等邀擊於太平墟遂生縛雞二賊勢

為之少奪從化志

四年春增城大旱是歲饑增城志

香山小纜生瑞芝香山志

五年六月八日夜有大星如毬東流於南響震一聲光散十

餘道照耀如日犬馬皆驚新會志

七月新甯大水漫城新甯志

六年海賊流劫新甯船頭石諸鄉知縣劉軒孺督兵禦之俘

數賊乃遁新甯志

新會大旱饑新會志

七年春二月順德小灣有虎傷人順德志

三水大水颶風三水志

新會大雨海水溢毀壞廬舍新會志

秋八月增城山盜大起增城志

賊首廖九賓嘯聚銀場浦崗黃仲積合福建賊邱能繼據

上下坪諸崗賴鷄二據花竹山諸崗又福建賴丁髻英德

廖大鼻上坑張惟冲等據從化蘭禾白牛溪頭等崗鍾國

讓據鬱崗馬村諸堡各聚眾數千人四出流劫鄉村無不

殘破增城志

莊烈帝崇禎元年春不雨從化志

三月增城水東民崔姓有豕忽蛻其皮爪增城志

夏六月從化大風毀文廟從化志

秋增城知縣陳世鳳計擒賊首廖九竄磔之增城志

時九竄據東北一帶山谷遣惡少年竄身輿隸以窺邑中動靜世鳳於八月到任廉得其狀收惡少年三人置於法自是偵諜乃絕密以方畧授主簿羅應鳳假催科抵賊境

鈎致賊黨令縛渠魁自贖因伏兵岩外以俟遂擒九竄賊黨俘斬無算典史王萬春入其巢穴焚之奪還被擄男婦

共一百二十二人增城志

九月十八日賊首黃仲積掠田尾村千戶唐繼祖追戰被執不屈至石龍頭死之增城志

時知縣方大猷請兵撫按遣叅將陳拱領兵進剿親冒矢

石擣其巢穴擒賊六十五人斬首三百餘級招撫甚衆獨仲積竄去拱行師紀律嚴明秋毫無犯增人誦之增城志

三水羅山賊出大掠樂塘等鄉劄三日去三水志

春夏旱歲大饑新會志

二年水賊大揚羣艘肆劫薄西南窺三水邑城擄解糧官馬釀於滄江登婆子灘岸屯屠牛鼓飲以鄉人有備而去三水志

新會饑新會志

三年艦賊李魁奇入寇叅將陳拱死之新安志

艦寇百餘隻闌入拱督寨兵禦之於佛堂門外擒七艘賊之賊忿直至南頭海拱以兵少不能禦入城賊因登岸設

雲梯攻城守陴者燒大銃斃賊首折其梯賊乃解去南頭地方盡被焚劫巡撫乃發金八百給官兵及民之被殺者

時賊勢益熾移泊電白蓮頭港巡撫令拱統烏艚及寨船百餘艘出剿拱忌同事者分功督大船自為前鋒一鼓而敗拱因死焉新安志

春正月下山盜鍾國讓伏誅其弟國相復聚眾寇掠從化志

國讓馬村堡鬱崗人短小精悍以事亡命為盜徒黨千餘所至屠戮甚眾總督王尊德遣參將陳拱征之不克拱乃撫之國讓遂就受節制無何拱歿國讓與其黨相仇殺復跳如故至是因潛至省城為仇家所執送於軍門立斬之時國相聞風遁匿居半載復招集餘黨尊李三角為師倡妖言惑眾兩月間其勢轉熾劫擄殆無虛日從化志

三月新安黑靑見新安志

夏龍門大雨連旬山崩地潰禾稻淹沒穀價騰貴民多饑死

龍門志

增城羅浮山崩五十四處羅浮山志會編

東莞梧桐山崩水暴至城圯百餘丈東莞志

冬十一月至日從化賊鍾國相劫羅岡村又往博羅劫銀岡村已道邑城之西郊返寨黃仲積賴丁髻等欲往江門行劫道遇之乃合謀薄城東屯壘頭村時撫按遣兵守禦增城皆精銳知縣陳世鳳人覲龍門知縣任可受來署邑事畏怯殊甚不敢發一矢次日賊去乃出兵增城志

十二月鍾國相掠湯里汾諸村子女財帛殆盡所殺二百六十三人增城志

新會大饑新會志

四年正月日色如血光照人馬皆赤新會志

二月巡按御史高欽舜遣叅將陳照李相討上下山賊知縣王至章率兵協剿執賊首陸彥博賴丁髻廖大鼻等誅之鍾國相亦被殺從化志

先時協剿之議下於各邑檄徵軍餉諸盜聞之相謂曰兵來我去兵去我來若我何於是多解散潛逸王至章乃率鄉兵分守要害生擒賊首梁得虞等一百五十餘徒斬獲首級甚眾及兩路兵至賊遁入深山又值大雨連綿不利兩軍乃堅壁清野搜捕餘黨計致彥博丁髻大鼻等縛之張惟冲獨逃未幾復聚眾肆掠從化志
夏五月增城知縣陳世鳳設計擒黃仲積誅之增城志
先是上官責邏仲積正急逮其親屬獄中世鳳故縱之懸厚賞偵其出入伏兵以待遂被擒增城志

冬十月練選軍郝通志

先是王業浩檄募練新兵三百名歲加餉銀三千兩指揮雷大壯上議萬厯初奉例揀選壯軍一百名教習烏銃守禦征調賴焉今更以四所軍揀二百名足三百之數立為三哨練之有警則聽調無事則守禦不煩召募不費增餉業浩以為然令粵省通行之惠州志

龍門賊首姚亞七葉明林明就陳長腳等各聚黨數百剽掠鄉邨民不堪命知縣任可愛一作受差練總張希廓往諭不從設團練捍禦令民自衛賊少戢後姚亞七等為鐵岡鄉勇所敗葉明黨為長甯大席鄉勇所敗林明就黨附陳長腳及林被執陳黨孤遂伏匿山峒不敢出掠龍門志

歲饑增城志

五年春三月增城大雨雹增城志

夏三水大水三水志

五月總督王業浩遣叅將李相復剿上山盜磔賊首張惟冲滅之以歸從化志

張惟冲福建人聞官軍復至潛踪據險李相督兵深入數日追及生擒之復擣其巢而穴地險僻人跡所難到者從化志

六月芝三產從化學宮從化志

先是二年芝生於教諭署後四年再生署前至是復生於署右教諭吳良謨紀以詩從化志

東莞北門民家生豕二頭二尾又教場民家生豕人首東莞志

龍門蝨害稼龍門志

六年春夏龍門大水秋大風歲荒龍門志

八月東莞東洲賴家生子二頭四手三足東莞志

舩賊劉香入寇閩撫將鄭芝龍敗之新安志

劉香乘風突入是年二月直泊虎頭門殺死守銃臺兵遂

抵省河下芝龍帥師出剿戰於赤岡破之賊乃遁去新安志

盜劫四會縣殺典史突入清遠縣治復由泰山王出池水河

峒等處抄劫村寨縣衛請兵指揮陳課效用把總洪昇追至

英德地名鍊屎坪生擒賊首陳尖鬚劉世豪袁可正等數

十人斃其黨無算清遠志

總督熊文燦檄樹沿海椿門南海志

七年春正月從化大雨雪從化志

虎至三水城東大坳山三水志

夏閩寇劉香掠廣東六月十五日從虎跳門入掠新會江門

二十日出厓門掠香山黃梁都香山志

六月十五日從虎跳門直抵江門劫掠珍寶殺擄男婦復縱火焚燒十六日劫滘頭井泥十七日躡入大悅滘追躡城池擊傷叅將齊某知縣卞應聘築塞津要賊不能入遂寇都會西甲十八日纜舟能海眈視城中二十日出厓門掃蕩奇石諸鄉先是總督熊文燦撫閩招撫鄭芝龍薦授叅將大職其治賊無他方畧率多用撫及督兩廣閩賊劉香卽至人咸咎之而文燦不知猶冀用撫賊入大悅滘口馬滘河塘共出鄉兵躡賊至白沙有差官王繩武持招撫旗止兵勿動賊遂揚帆而去於是郡邑洶洶咸謂文燦召寇縱之然文燦卒委兩道臣往招爲賊所留乃調鄭芝龍

擊敗之於魚珠驅之於海外盡殲其黨新會志

新甯颶風拔木越數日復作大水傷禾稼新甯志

九月南海龍津居民陳養東妻產一子兩頭南海志

八年二月順德大饑順德志

劉香復入寇閩撫將鄭芝龍平之新安志

劉香挾康洪二道官在船要撫春三月入泊城下持道檄索取城中炭鐵米肉新安知縣烏文明與士民堅守不應每夜然炬傳籌相持月餘香乃縱火城外知縣因誓師出城救火守備余子高以牛酒犒師我師奮擊乃少却五月會鄭兵遇賊於田尾剿滅之新安志

夏龍門大水龍門志

三水縣前隄決仍大雨一月城圯西南傷稼不收三水志

六月免是年存留錢糧十分之三準給事中宋權題也新甯志

八月命府州縣積穀抽十之三助邊餉徵生員優免丁銀助

餉郝通志

水賊連夜圍劫三水龍池三水志

賊徒百餘夜泊葫蘆岡鳴銃撞鄉初擄四人去殺鄉兵二

人次夜再圍劫鄉甲拒之互有損傷知縣沈嚴督哨把防

捕翦弭土賊地方賴輯三水志

增城大有年增城志

九年大饑東莞志

龍起城西南柳波涌海上南海志

十二月龍門大水傷麥殆盡龍門志

增城大雨雹增城志

十年龍門蝗穀貴龍門志

十三年庚辰四月颶風作新會城塌一百六十丈新會志

五月城西鄧聖圖簷柯集異蟬二七八日始去蟬大如掌人

面頭目口鼻俱全南海志

秋七月有大星流於廣州城外東北星大如盤長如練其光

燭地蓋天狗星也南海志

增城地震增城志

十四年夏淫雨三月不止龍門城崩二百餘丈龍門志

五月大水決大路實圍害稼三水志

南海丹桂等十八堡悉被淹沒知縣朱光熙駕農舟行泥

淖中躬撫慰請穀賑恤仍築墟隄以杜後患時三水大路

峽水勢建飯一槩衝決又捐俸助修峽路及申請兩院司

道府各助工峽基始竣

南海志

八月虎至城北濠居民環捕之竟逸去

南海志

十一月新安銀瓶嘴山賊入寇

新安志

賊鼓樂監幟直入龍躍頭村居民震恐報至知縣周希曜密授方畧發兵趨剿擒賊首縣花王等三十餘人斬首三百餘級乃解復命兩營鄉兵追擊之賊困山中罕有脫者

新安志

十二月晦三水西南街被火延燒三日乃滅

三水志

新甯伍道昌盜起

新甯志

十五年兩廣地震

明史五行志

九月蠲十二年以前逋糧

郝通志

增城大有年

增城志

十六年新會沙岡賊張酒尾那伏賊關逢三嘯聚百峯山古

兜山

香山志

時平康得行登名古博四都賊以沙岡張酒尾那伏關逢三為首嘯黨百峯山肆劫鄉落新會知縣李光熙廉得之帶兵搜捕盜皆逃入山新會之賊遂自此始四十餘年不

止

鶴山志

四月二十四日新安颶風作大雨拔木毀屋覆舟甚多

新安志

夏龍門大旱七月大風雨歲歉

採訪冊

冬十月賊首陳長腳犯從化城下

從化志

聚黨數千突犯城外通濟街劫掠而去李相召募崗兵追之

從化志

十一月晡時有流星光芒丈餘自西南入東北有聲

郝通志

增城山寇復起增城志

山寇復起結營博羅歐陽尚去邑城僅二十餘里知縣林明興晝夜城守賊不敢犯乃退還背陰明興戎裝躍馬率鄉兵追賊焚其巢穴奪被擄男婦二百五十餘人而還增城志

南海譚宗浚分纂 南海梁 起初校 順德盧乃潼再校 番禺史悠履三校 順德羅 槩四校 廣州府志卷七十九終

廣州府志卷八十

前事畧六 國朝

國朝

順治元年明崇禎十七年春新會大雨雹新會志

龍門有白燕巢於城東門霪雨兩月燕忽自隕龍門志

三月廣東地震明史五行志

二十八日龍門驟雨狂風大雨雹寒甚樵夫行人多凍死龍門志

秋七月賊劫增城逕口村采訪冊

時指揮同知周之錡住逕口之右知縣林明興統民壯鄉勇駐逕口之左賊出挑戰之錡不遵明興所授方畧即發軍明興止之不及軍大潰之錡墜馬走死明興遂被獲越

二日賊知其不可屈乃送之出山

增城志

二十一日有紅雲在龍門西北山望之如一血山

龍門志

新會知縣李光熙勦那扶伏獲關逢三誅之遊擊郝時登擊

張酒尾殲其黨

新會志

署新會縣事姚生文遣撫羣盜

采訪冊

署縣事市舶提舉姚生文以張酒尾關逢三雖死而賊勢

尙熾下令招撫於是涪頭司徒義潘村鄺歪髻鄺于康那

伏關逢四沙岡張述璽張允初張產旺張村黃宗炯程村

梁華韶談雅關肥三麥村麥長公斗洞伍仲幾錢岡簡番

王那有許甲三新村許亞保李玉林龍塘何榮勇沙岡林

崇勒等盜首數十人皆出就撫劫掠稍息然時事日非賊

亦從此日盛

新會志

冬十二月峒賊譚天池擾龍門

采訪冊

是年流寇陷京師峒賊四起武舉譚天池

名高

領守備劄

欲乘機作亂陰給衙役阮聖祥阮聖超糾山賊老虎哥馬

過河等數千於十二月初六日圍城水陸梗絕知縣白為

袞不得已出庫金千兩求和賊受金不去時歲貢戴光震

避亂增城聞之即訴增城令林明順

阮通志職官表作林明與

飛報大憲告急巡撫王化澄委監紀姚生文參將嚴尊誥赴援於

二十七日破賊解圍賊黨竄入路溪渠魁未殲羅從天結

寨牛逕沈章龍結寨沈村邵靖權結寨第七屯李培芳易

昌唐隆結寨塔嶺下賊焰自此愈熾白為袞以賞寇罷

龍門志

東莞增城大饑

東莞志增城志

二年春二月社賊起新會志

以奴脅主謂之社賊亦謂之僕賊始自順德沖鶴堡延及

諸縣所在多有香山志

三月不雨夏五月乃雨新會志

六月龍門賊高招手等劫南山等村守備史謙擊破之增城志

謙福建人奉委鎮增城號令嚴肅龍門賊千餘流劫南山

時江水暴漲謙所統兵渡江者僅六十餘人皆不及渡即

大呼入陣擒高招手及土賊六人斬首三十二級奪還被

擄子女二十五人賊鋒始挫增城志

冬十一月十四日白旂賊黃信林能船數十艘劫海洲香山志

三年二月大雨雹南海志

夏四月白旂賊至新會新會志

先是高鎮林芳黃信麥明襄葉垣居黎侯璽梁帝覺等聚

黨百餘艘出海剽掠名白旂賊監紀陳某招之入伍遂稱

義師揚帆至邑人莫敢抗知縣黃灝中招所撫山寇入城

就近制之未幾葉垣居在城下抄掠把總司徒義出擊之

垣居敗遁獲其黨數十人殺之諸賊踞各鄉為亂新會志

五月白旂賊劫江門新會志

六月海道副使洪天擢海防同知姚生文率兵勦白旂賊擊

走之殺撫目鄺歪髻

時以盜賊充斥請於兩院八月設城守遊擊李承一員中

軍都司一員防兵五百名新會志

八月龍門賊袁勝祥統眾數千人犯增城增城志

時知縣黃明衮與其屬皆赴省教諭郭衛馨率諸生及鄉

耆固守六晝夜不懈搜城中賊間斬之賊乃遁去遂屠沙
澗復掠石灘石灘鄉勇糾合黃埔村水陸夾攻擒斬袁勝
祥并其黨若干級奪還子女牛馬財帛無算增城志
冬十一月故明大學士蘇觀生等以唐王聿鏞稱號於廣州

通鑑
輯覽

丁魁楚等之將立桂王由榔也蘇觀生欲與共事魁楚素
輕之且欲專定策功慮其以舊相居已上拒不與議呂大
器亦以其非兩榜叱辱之觀生愠甚適唐王聿鏞弟聿鏞
嗣為唐王者與大學士何吾騶自閩浮海至南海關捷先
番禺梁朝鍾首倡兄終弟及議觀生遂與吾騶及布政使
顧元鏡侍郎王應華會道唯總兵林察等擁立聿鏞改年
紹武就都司署為行宮封觀生建明伯掌兵部事進吾騶

等秩擢捷先吏部尚書旋與元鏡應華道唯並拜東閣大
學士分掌諸部招海上鄭石馬徐四姓盜授總兵等官與
肇慶相拒時倉猝舉事治宮室服御鹵簿通國奔走夜中
如晝不旬日除官數千同上

桂王由榔遣兵攻唐王聿鏞不克同上

桂王由榔遣給事中彭耀主事陳嘉謨齋敕往諭唐王聿
鏞至廣州以諸王禮見備陳宗支倫序及監國先後語甚
切至因歷詆蘇觀生諸人觀生怒執耀殺之嘉謨亦不屈
死即日發兵攻肇慶以番禺人陳際泰督師由榔遣兵部
右侍郎林佳鼎帥兵赴三水佳鼎故粵中監司與林察同
姓相善察使羣盜詐降佳鼎信之乘勝追至三山口亂作
全師皆覆佳鼎同僉事夏四敷赴水死時肇慶大震瞿式

耜視師峽口以王化澄代佳鼎督師呂大器辭官入蜀遂以化澄爲尙書起李永茂爲大學士未幾亦罷同上

十二月

大清兵克廣州獲唐王聿錫同上

蘇觀生既敗肇慶兵意自得務粉飾爲太平事而委任關捷先及梁朝鍾捷先小有才便筆札朝鍾善談論浹旬三遷至祭酒有楊明競者好爲大言詭稱精兵滿惠潮間可十萬卽特授惠潮巡撫又有梁鑿者妄人也觀生才之用爲吏科都給事中與明競大納賄賂日薦用數十人觀生招海盜資捍禦其衆白日殺人懸肺腸於貴官之門以示威城內外大擾時大兵由福建趨潮州俱下之長吏皆降附卽用其印移牒廣州報無警觀生信之是月十五日聿

錫視學百僚咸集或報大兵已逼觀生叱之曰潮州昨尙有報安得遽至此妄言惑衆如是者三大兵已自東門入觀生始召兵搏戰兵精者皆西出倉猝不能集觀生乃自縊死鑿獻其尸出降朝鍾聞變赴池爲鄰人救出自剄死太僕寺卿霍子衡召三子訓以死節朝服北向拜又易緋袍拜家廟先赴井死妾莫氏從之子應蘭應荃應芷及其妻各繼之有小婢見之亦赴井死行人梁萬爵赴水死新城知縣廖翰標自縊死子衡南海人賜諡烈愍萬爵番禺人翰標龍門人與朝鍾俱賜諡節聿錫方閱射急易服踰垣匿王應華家俄縋城走爲追騎所獲饋之食不受曰我若飲汝一勺水何以見先人地下投繯而絕何吾騶及應華等皆降

山賊黃蠻長海賊黃信等合犯新會邑城城內捕殺賊黨張

述璽等百人把總司徒義擊信斬之賊退

新會志

初撫目張述璽以效用把總隸城守李承綜部下惟司徒義鄺于康殺賊有功及廣州破山海羣賊將襲邑城承綜與述璽謀通諸賊共掠城中子女玉帛分之遂招外寇李玉林等竄居城內惟撫目司徒義及把總黃瓊等以爲不可且以大義責承綜承綜曰事已就緒奈何義曰述璽易與耳請以計取之二十四日海賊黃信先至樹幟都會山上二十五日承綜招述璽會議於坐殺之及其黨八人夜勒兵捕李玉林等誅之是日山賊黃蠻長張允初張產旺麥長公關逢四黃宗炯梁華韶等亦至屯兵五馬大雲諸山大掠城外城上擲述璽玉林諸賊首級示之賊氣稍沮時山賊甚夥皆按甲不動惟水賊攻東北方甚急鄉官譚

正國何士琨劉坊莫若簡等相率先登陴辦火藥賊糗糧僉謂水賊易與若先擊破之則山賊不戰自退矣於是何士琨劉坊暨士琨弟姪生員許法頤數家捐銀一萬爲犒賞費俾司徒義鄺于康各率所部撫丁出擊之以二十九日縋城下直奔水賊賊斬無算司徒義擊黃信墮馬取信首級馳其馬而還海賊遂潰是夜山賊亦退次日李承綜逃去知縣黃灝中出署官兵皆散城門不閉而賊方退未遠合城洶洶乃擁司徒義至遊擊府奉之守城待

國朝官至

新會志

四年春正月王興圍新甯至二月將官張道瀛郝尙文率兵往征圍乃解

新甯志

蕉園外海四姓賊船千餘艘謀劫香山知縣劉起鳳督兵卻

之掠西門外及圓山仔長洲而去香山志

龍門賊圍橫壘幾半月守益堅乃縱掠諸鄉副將李棲鵬統

兵至擊破之增城志

二月賊圍臘埔至月餘道路梗塞提督李成棟引兵從山而下擒斬甚眾餘賊奔竄溺死又百餘人時應賊者為潭村并

征之賊遂衰息增城志

山賊黃蠻長等圍新會采訪冊

獨岡賊黃蠻長糾合新會新甯新興恩平遠近羣盜凡十餘萬以是月初四日圍城用雲梯攻濠橋一帶城堞盡為鈎廢士皆傳餐而食司徒義百方禦之鄉官何士琨募鄉勇三百人遊巡策應至十一日賊毀附城民居以甌石投城下與城齊會是日大霧總師張月郝尙久王志作尙文援兵

猝至從教場直奔馬山賊大潰追至分水江馘斬無算時

商販不通穀價日湧生員李枝橋乃請縣給票勸諭各商

運穀赴城賴以贍給新會志

三月新會大雨雹新會志

四月桂王由榔兵科給事中陳邦彥以兵犯廣州敗走通鑑輯覽

初邦彥見桂王由榔於肇慶擢兵科給事中遣齋敕還諭

蘇觀生邦彥聞使臣彭耀被殺遂變姓名入高明山中及

大兵已定廣州列城悉下邦彥乃潛謀起兵有余龍者本

萬元吉所募兵未行而贛州失龍等千餘人無所歸聚甘

竹灘為盜他潰卒多附至二萬餘人桂王總督朱治澗招

降之未幾謀歸而唐王所置廣西巡撫張家玉亦與舉人

韓如璜結鄉兵陷東莞城籍前尙書李覺斯等貨以犒士

奉表桂王由榔由榔進家玉兵部尙書尋為大兵擊敗如

璜戰死家玉走西鄉家玉祖母陳母黎妹石寶俱邦彥見

粵西危急說龍乘間圍廣州而已發高明兵由海道入珠

江與龍會且移家玉書曰桂林累卵但得牽制毋西潯平

閱可完葺是我致力於此而收功於彼也家玉以為然邦

彥遂與龍聯兵犯廣州圍其城龍卒故無紀律大兵自桂

林還救揚言取甘竹灘龍等顧其家輒退邦彥亦却歸大

以廣州之圍謀出邦彥求其家獲妾何氏及二子厚遇之

為書招邦彥邦彥判書尾日妾辱之子殺之身為忠臣義

不顧既乃遣門人馬應芳會龍軍陷順德無何大兵至龍

戰敗應芳被執赴水死龍再戰黃連江亦敗歿大兵攻家

玉於新安時西鄉大豪陳文豹奉家玉陷新安襲東莞大

兵至家玉敗走鐵岡文豹等皆死李覺斯怨家

王甚發其先壟毀其家廟盡滅家玉族市井為墟家玉過

里號哭而去道得眾數千復陷龍門博羅連平長甯歸善

諸州縣還屯博羅邦彥乃棄高明收餘眾徇下江門據之上

峒賊譚天池陷龍門采訪册

知縣林之秀以譚天池罪狀申請委勦事泄天池密遣人

三殺驛卒而之秀不知遂通賊首林國瑞劉溼眼李啟新

林耀松林冲霄等率黨二十股於四月二十九日圍城陷

之繫知縣林之秀教諭藍奮興殺典史汪熊被擄生員譚

六經大叫曰

朝廷命官不可輕殺語未竟賊從旁刃之城遂為所據張府志

五月南海大水南海志

六月新安度龍山有白氣如羊化為蚊從西去又鴉鳴十日

夜新安志

秋七月靈山賊糾楊梅崇賢二都賊攻增城四日乃遁去增城

廣州府志 卷八十一 前事畧六

增城城門鎖動有聲如鼙鼓增城志

八月桂王由榔東閣大學士陳子壯以兵犯廣州敗死通鑑
子壯家居九江村桂王由榔稱號授東閣大學士兼兵部
尚書總督廣東福建江西湖廣軍務會大兵入廣東子壯
止不行及張家玉陳邦彥與新會王興潮陽賴其肖等先
後舉兵子壯亦以是月聚兵九江村兵多蠻戶番鬼善戰
乃與邦彥約共攻廣州結故指揮使楊可觀為內應子壯
先至駐五羊驛事洩可觀等死將引退邦彥軍亦至謀伏
兵禺珠洲側伺大兵還救會城而縱火以焚舟子壯如其
計果焚舟數十大兵引而西邦彥尾之會日暮子壯不能
辨旗幟疑皆大兵也陣動大兵順風追擊遂大潰子壯走

還九江村長子上庸陣歿邦彥奔三水會故御史麥而炫

高明人陷高明迎子壯以故主事朱實蓮南海人攝縣事而清

遠軍指揮白常燦亦以城迎邦彥與諸生朱學熙嬰城固

守邦彥自起兵日一食夜則坐而假寐與其下同勞苦故

軍最强嘗分兵救諸營之敗者至是精銳盡喪外無援軍

越數日城破常燦死邦彥率數十人巷戰肩受三刃不死

走朱氏園見學熙縊拜哭之旋就執饋之食不食繫獄五

日就戮死高明亦破實蓮戰死于壯而炫俱執至廣州不

降磔死時張家玉走龍門復募兵萬餘人攻據增城大兵

高厓自固大戰十日力竭而敗被圍數重諸將請潰圍出

家玉歎曰矢盡礮裂欲戰無具將傷卒斃欲戰無人鳥用

徘徊不決以頸血濺敵人乎哉因徧拜諸將自投野塘中

俱以死子壯賜諡忠簡邦彥賜諡忠烈而炫實蓮常燦

予諡賜諡烈愍家玉以甲申出謁聞賊初節有虧廷議不

時霍師連守三水邦彥兵起師連誘佟養甲屬官數人斬之反戈以應從攻廣州不利退至三水大小十餘戰斬首級千餘清遠衛指揮白常燦舉城迎之師連與邦彥列柵江上為拒守計李成棟至不得戰憤罵城上會北風大作師連出不意疾以火舟出擊成棟偽逃師連盡舟追之數里風返成棟因以火舟相攻舟迫柵門不得入盡焚師連策馬渡河將走四會求救成棟追及甲重墮溺而死南海志濶江賊犯清遠城擄掠與仁鄉鄉民追殺之賊殺敗走瀾水以負重淹死無算清遠志

新會地震新會志

十一月池水陽山寇突至清遠城守道劉嗣寬知縣陳璫棄走山寇盡焚城內房屋而去清遠志

山寇陳耀破大鵬所城劫擄而去新安志

五年春大饑斗米八百錢南海志

峒賊譚天池伏誅采訪冊

夏四月提督李成棟叛以廣東附桂王由榔通鑑輯覽

成棟本高傑部將以徐州總兵來降從王師平粵用為

提督成棟不樂受總督佟養甲節制常懷異謀及是金聲

桓誘之同反計益決是月十一日黎明成棟令其兵集教

場聲言索餉欲為變成棟請養甲出城撫輯養甲至眾兵

呼噪劫之以叛遂傳檄各屬遣使附于由榔廣西巡撫耿

獻忠聞之亦舉梧州叛降由榔封成棟惠國公養甲襄平

伯以獻忠為兵部尙書通鑑輯覽

新甯羣盜起新甯志

大雨龍門山崩龍門志

秋八月順德地震順德志

冬十月順德龍江康乙農家產兒暴長十日內已如五六歲

順德志

六年二月

大清兵至信豐李成棟敗死桂王由榔以杜永和為兩廣總

督駐廣州通鑑輯覽

夏五月海上流血番禺志

秋七月順德地震順德志

八月大風拆屋拔木南海志

進封尚可喜平南王耿仲明靖南王使定廣東各率其部兵

以行仲明道卒子繼茂襲與可喜同定廣東皇朝武功紀盛

七年二月

大清兵圍廣州通鑑輯覽

時李赤心已死養子來亨代領其眾推高必正為主大兵

圍廣州桂王由榔命陳邦傳與必正東援邦傳故與李元

允有隙意在修怨又憾必正等之屢擾其境也陰令副將

姚春登連結土司會來亨等調兵土司遂相讎殺必正怒

而歸邦傳駐清遠馬吉翔駐三水俱不敢進廣州城守久

李元允弟建捷拒戰甚力由榔封為安肅伯通鑑輯覽

夏六月二十三日賊首羅從天沈章龍邵靖權陳亞桃林正

寰等復率眾屠龍門縣城殺署縣林啟呂龍門志

秋八月初五日順德大風雨拔木順德志

十一月

大清兵克廣州通鑑輯覽

廣州城三面臨水李成棟在時築廣州城兩翼附于城外為礮臺水環其下大兵攻圍十閱月不下杜永和偏將范承恩約內應決礮臺之水大兵藉薪徑渡遂得礮臺是月二日克其城承恩來降杜永和由海道奔瓊州通鑑輯覽十二月海賊沿劫三水彭坑等鄉邑人李震元擒之三水志時海賊披猖河南西江一帶蓬村龍池天湖等近海鄉村皆被劫有巨魁一十八人從彭坑將入洲邊官員等鄉李震元率鄉眾誘至西頭岡廟殺之自是賊不敢入內地三水志

八年春二月順德大雨雹如斗破屋斃牛馬順德志夏五月二十四日順德大星隕如雷順德志

官軍討新會劬竹門社賊平之采訪冊

劬竹門社賊自四年即為害地方八年夏五月原臨湘典史李耀文等乞知縣劉象震請兵勦賊斬首五千餘級平之新會志

秋九月勦綏福雲母楊梅各寨賊增城志

時三都負固不供賦招集長行馬賊攻掠村落至是遣兵往勦增城志

守道陳贄招撫湛江下戶清遠志

先是順治四年湛江佃僕作逆殺主踞田鄉紳朱應鵬貢生譚所蘊朱祚陟生員譚大紳譚經邦譚天仁譚觀光徐奇昌朱人鳳朱人英徐必昌朱世鐸等俱被殺死屢經官兵勦捕至是贄親履崗穴開誠誕告始歸化焉清遠志

九年春二月官兵討馮春隆馮大倫餘黨復寇海洲鄉人力

戰禦之香山志

穀貴南海志

夏五月新甯甄天元盜起新甯志

秋龍門有蝗龍門志

七月五日晝東莞有九龍自龍穴山起至蓮花峯經臣上臣

下等村迴翔久之而隱時微有雲雨東莞志

增城大水增城志

八月朔香山地震響如雷鳴次日又震是日颶風大雨三至

晚禾災穀貴香山志

香山有豬生一子人頭隻眼頭生一角人身豬足無毛香山志

冬十一月香山饑賊梁子直為亂以催科迫故也城陷知縣

張令憲死之數日大兵至殲焉香山志

十年春廣州饑采訪冊

夏五月王興破廣海城守備張登榮死之新甯志

廣西賊據清遠城旬餘始遁去清遠志

官軍勦龍門諸賊采訪冊

知縣方以甯以寇盜未靖請兩藩用兵委牛采劉秉功帶

兵督勦塔嶺下路溪鰲溪等處獲賊首易昌唐隆李培芳

羅從天邵靖權梁有祥等斬之惟沈章龍未獲餘黨奔入

羊矢坑勾引鄰邑賊首湯舜張子隆等糾黨數千盤踞冰

清西水峒中居民流徙增城從化等縣賊黨益眾散居茅

岡張村第九屯路溪第七屯等處肆行劫掠三都十一里

無不受害龍門志

十一年春正月十八日大雪大有年龍門志

三月大旱順德志

香山石岐河水如血凡二日香山志

新會城震新會志

王興李耀斗踞石邊屠大隆崗新甯志

六月順德香山新會增城地震順德志新會志香山志增城志

李定國遣兵犯新會城秋七月藩兵擊卻之新會志

八月陳奇策據江門水師總兵蓋一鵬與戰死之香山志

九月李定國復遣兵犯新會城閏十三日遁去新會志

冬十月十四日李定國擁眾攻城圍困至十二月靖南將軍

朱馬巴牙喇燾章京教拜率八旗兵來援與藩院會兵擊走

之圍解新會志

先是定國凡兩遣兵犯城不下至是定國由高雷親督兵至號二十萬重圍密布礮聲不絕城內兵民協力防守越十餘日為地道攻城發如震雷西山城陷復拒卻之士民爭輦輒石完城十一月攻愈急以大礮擊務前城崩十餘丈死士盡銳奮登然阻於城濠飛箭鳥鎗如雨定國前鋒擊殺過半卒不得入乃伐木填濠逼累城下謂之網青欲令木與城齊履之而登城中以膏沃薪縱火焚之惟葵樹不壞定國遂多伐葵城中乃鑿塹出民彼從外投此從內運遂不能累定國頓兵堅城幾兩月計無所出會謀者言城中糧盡定國遂罷攻連營分守重圍為持久計建造行宮署置官曹誅求鄉落諸所徵發凌雜米鹽民甚苦之而圍城之內自五月防兵一至悉處民房官給月糧為其私

廣州府志卷之八
有日用供需責之居停貧民日設酒饌餉兵辦芻豆飼馬
少不豐贍鞭撻隨之仍以糗糧不給為辭搜粟民家子女
玉帛恣其捲掠自是民皆絕食掘鼠羅雀食及浮萍革履
至臘月初兵又掠人為舖臘殘骸委地不啻萬餘舉人莫
芝蓮貢生李齡昌生員余浩魯鼈李吳登等皆為砧上肉
知縣黃之正莫敢奈何撫膺大慟而已十有四日援兵解
圍城中馬有餘粟兵有餘糧所遺民鷄骨不支督院李率
泰慰勞將士存恤百姓為之流涕曰諸將皆有全城之功
亦有肝人之罪此諸將所以自損其功也而悍卒不顧猶
勒城中子女質取金帛不能辦者盡俘而去李督院數為
力言始覈一二還民至於靖藩所掠概留不遣自被圍半
載饑死者半殺食者半子女被掠者半天降喪亂未有如

是之慘者也先是餉援告絕大兵秣馬省城未有行意邑
民何廷賓潛行水中出敵營外致蠟書請師城賴以完亦
廷賓之力也新會志

十一月王興擄舉人陳王道遂據文村新甯志

官軍征濶江三块田盤古王等處賊平之清遠志

十二年春正月大旱順德志

二月新會城震新會志

把總陳雄率兵民攻增城石山田賊不克增城志

時賊肆掠鄉村橫行無忌擁兵薄城是年春正月把總陳
雄集民兵攻之失巨銃而返二月六日復集民兵攻之斬
二級次日賊糾長行馬賊逆戰民兵奔散又失巨銃二小
銃兵器無算民兵被殺一十二人後陳雄奔入鄧山賊寨

竟死寨中

增城志

冬十月東莞大雨雹

東莞志

十二月香山雷雨電

香山志

十三年春二月新會地震

新會志

三月遊擊郭登第復廣海衛

新甯志

夏大雨城內屋壞

南海志

新會沙涌賊劉保據官田黑坑諸山作亂

新會志

保于前後諸賊為最桀黠所部林時象李山官七梁經王劉裔進劉萬啟黃元沛黃元述等皆劇賊自保起後連年用兵至康熙八年總督盧興祖招而殺之其黨林時象等奔歸復為盜魁

新會志

分守道郭景昌招徠清遠城內居民請詳三院寬徭役免荒

稅練鄉勇民得安戢

清遠志

大有年

龍門志

新安賊李萬榮就撫來降

采訪冊

先是順治四年山寇陳耀破大鵬所城賊首李萬榮據城羅欽贊盤踞梅沙葵涌等處四出流劫縣城鄉村房屋焚毀過半殺擄男婦數萬十一年總鎮吳名討之以水師不利回兵其後兩賊不睦李殺羅欽贊至十三年總兵黃應傑率師以劉烘為鄉導圍李萬榮于大鵬山三閱月糧盡李萬榮投撫地方始平

新安志

十四年冬十月順德龍山有虎傷人

順德志

是年清遠土匪龔昌斌因靖藩有示招營官開鐵爐遂在泰山山聚集流亡開爐煽鐵

清遠志

十四年巡撫金某知縣魏某募鄉勇平水口洞賊采訪冊

水口洞在黃陂堡南距山下北距慕園四山壁立明季鼎

革花山賊首林赤鬚占據駐札嘯聚數千人屢行劫掠官

兵進剿數年不克至是巡撫金某番禺知縣魏某召募鄉

勇以車陂蘇觀光為督帶黃陂黃鳳賢為鄉導簡文作為

內應合黨下及慕園黃登等十八鄉盟于車陂萬善堂偵

知正月初六日諸賊會飲因乘其醉直抵巢穴賊倉卒無

備一鼓成擒計十八鄉陣亡者李灼花朱倉明陳三友等

一百三十八人事平準給水口地方所入為十八鄉祀產

至今十八鄉每年正月初六日猶設壇追薦焉番禺志

十五年春二月王興黨掠新甯冲雲劉真洞新甯志

大有年番禺志

十六年春奉檄勦綏雲山賊增城志

兵至奸徒以招撫蠱惑縣官駐兵三月不動士民煩言日

甚乃勦石山田村罷之既罷之後賊之就撫者攜所擄子

女至西門駐劄勒贖或乘馬入城無忌道路以目自是名

為招撫而肆劫更甚於前增城志

閏三月初四日順德大雨雹順德志

八月王興自焚餘黨降文村平新甯志

禁沿海兵民不許出界貿易新甯志

十一月花山賊流毒清遠吉河滘江等村兩藩發兵進勦洪

懋樞督師時城庫被劫查賊無踪清遠志

新會雨雹新會志

十二月復檄勦綏雲賊增城志

時賊首吳偉新等肆劫益甚督院令總兵郭某統兵追駐清湖鍾陂頭南學等處紀律嚴明縣丞卞其隆所運兵糧器械俱極齊一擬一舉迭掃而知縣李牲如新任遂以招撫故事罷之增城志

三水知縣劉應騏請兵於郡遣段將官失帥師摘勦胥江土寇平之三水志

十七年春正月增城雨雪增城志

正月不雨至夏四月始雨從化志

六月從化爐丁叛知縣孫繩請罷爐以散其黨從化志

先是鐵山密邇鴨崗爐賊踞地而居鄧裴葉三姓之眾被其所害積屍斷流迨兩藩兵器需鐵爐商何玉秀投藩開礦其眾益多知縣孫繩請罷爐以散其黨害遂息從化志

秋七月耿繼茂移駐福建滿漢名臣傳耿繼茂傳

初繼茂與可喜攻下廣州怒其民久相抗凡丁壯輒誅戮即城中駐兵牧馬營造靖南平南兩藩府東西相望繼茂尤汰侈廣徵材木採巨石于高要縣之七星巖工役無限制復創設市井私稅民苦之會布政使胡章自山東調廣東行至江西聞官解為兵馬所占具疏劾繼茂可喜縱兵不戢狀繼茂奏辨曰前者我兵圍廣州九月被賊礮擊鋒傷不知凡幾城下之日即食肉寢皮未克洩忿俘繫實多至部眾初雖襍處旋即移駐北城未嘗久占官解可喜辨亦同胡章坐誣罷任逾年高要知縣楊雍建內擢給事中疏陳廣東採買濫役私稅諸大害謂一省不堪兩藩請移一藩於他省疏下所司察議時貴州雲南底定經畧大學

士洪承疇請分駐重兵于要地於是

命繼茂移駐福建滿漢名臣傳 耿繼茂傳

謹案番禺志云可喜等屠城死者七十萬人民居遂空兩藩兵因盡入居住號為老城文職衙署俱於新城權設

城權設

九月官兵進勦官田新會志

十一月初八日雷電作連兩七日夜乃止新安志

十八年春正月大雨雹傷屋殞畜順德志

從化高沙流寇起知縣孫繩帥眾襲之獲其賊首花廷魁葉長清以歸餘黨悉平從化志

高沙一帶附近增城龍門靈山羊屎坑等處鄰氛竄入出沒無常至是聚眾知縣孫繩親領城守兵銜枚突至攻其

不備獲賊首花廷魁十餘徒救出難民李卓登等餘賊奔竄遂平從化志

罷清遠爐工餘黨復聚為盜采訪冊

先是爐丁為盜流劫七邑殺擄男婦數千至是靖藩入閩鐵爐罷工爐賊不散藏匿山谷九月分作兩巢一聚于髻山流劫四鄉邑兵鄉勇屢戰不能撲滅一聚太平池水慘

殺良民動以千計清遠志

三月總督李棲鳳率兵勦平池鄉賊采訪冊

總督李棲鳳調懷集陽山廣甯四會清遠兵會勦池水鄉賊馮天保賊遁水巖凡半月官兵壘石塞潭砍樹木發火

巖陷賊黨就縛先是天保黨馮天俊李毓之劉智剛等皆受天保偽劄煽惑十崗頑民倡亂踞糧流殃五縣已將十

前事畧六

載至是盡殲清遠志

夏新安紅花嶺有白氣遠望如白羊成羣新安志

五月分守道牟原缺委清遠教諭黃許礫安撫池水鄉十崗

民皆安堵十二月商人又招工復開鐵爐清遠志

冬十月雷鳴三水志

十二月增城賊攻崔家園遂薄縣城未幾復遁采訪册

是時賊首吳抱薪妻子皆繫獄遂于十二月十一日率數

百人各藏利器泊舟增江驛旁次日天明突起攻崔家園

直迫城下以脅縣人出其妻子署縣事徐茂勛登城守禦

賊見其有備乃退十七日提標遊擊陳大用統兵至賊聞

風遁擣其巢焚之大用統兵有紀律秋毫不犯兩月代去

士民攀留之不得增城志

康熙元年春正月從化知縣孫繩率兵征鴨崗賊平之從化志

鴨崗負山帶水地極險要向為裴鄧葉三姓疆里爐丁聚

眾流劫屠戮靡有子遣知縣孫繩乃代為申請會龍守禦

王菁名把總鄭名失分兵為犄角之勢而自率典史吳憲周

遊擊李青守備高明千總夏應魁謝芝奇分道進攻巡檢

孟世元為先鋒奮力併攻殲其渠首峒賊遂平從化志

三月詔瀕海居民內徙新會志

時賊鄭錦猖獗

命內大臣科爾坤介山巡視濱海居民令徙內地五十里賑

貧民之不能遷者郝通志

夏五月廣州大水采訪册

新安潮溢新安志

六月增城知縣徐鳳來令撫目索盜得吳猫聶牛郭太公等然搜捕滋擾民無甯處增城志

新甯賊甄天元伍道真與開平賊張嘉耀劫獨岡新甯志

秋八月官兵進剿馬岡朱福等賊至冬十二月師旋賊勢復熾新甯志

熾新甯志

二年春二月二十六日暴風疾雷雨漂泊船隻淹死人民千計南海志

計南海志

新會雨雹新會志

夏三水賊劉寶日劫周村莘村鄉城守張邦泰往捕之不克三水志

三水志

秋八月二十七夜大星墜順德志

九月初八夜有大星墜於東方聲如雷南海志

謹案順德志載此事作初七日未知孰是考番禺新會志亦作初八日今從之

冬十月蠶賊李榮周玉反破順德縣城擄知縣王印而去并流劫沿海鄉村采訪冊

周玉李榮皆番禺蠶民以捕魚為業所轄繪船數百其上可以設樓櫓列兵械三帆八掉衝濤若飛平藩尙可喜以其能習水戰委以遊擊之任遇警輒調遣防護水鄉賴以安輯自康熙壬寅奉有海禁之

旨於是盡掣其船分泊港汊遷其孥屬於城內玉等鸕獺之性不堪籠繫詐稱歸葬請于平藩可喜許之明日攜家出海糾合亡命聲大振癸卯十一月連檣集艦直抵州前盡焚汎哨廬舍火光燭天獨於民居一無騷擾復破順德縣

執縣令王允而去可喜聞變亟發舟師剿捕獲賊首周玉
餘黨解散出王令於賊舟釋其縛令得不死是時尙藩與
督撫兩院俱諱其事王僅罷職而已鮑

謹案順德志載此事於康熙元年與鮑騰互異疑榮
王之叛在元年而破順德則二年事也順德志僅據
胡士洪筆記未審確否今不從

十二月蠶賊突入新會江門遊擊張可久死之復寇香山海

洲采訪

平藩尙可喜遣兵追蠶賊破之周玉就擒餘黨以次潰散采訪

官兵追至大石海與榮玉大戰自辰至未周玉就擒李榮
與餘黨竄匿尋發兵沙灣搜捕餘黨將抵菱塘界巡檢

君玉以所部無叛黨叩馬止之請以身殉將兵者悟而止

菱塘民賴安番禺志

玉自稱恢粵將軍以林輔邦為軍師所至焚劫殘破順德
可喜發兵勦之斬級二千餘擒玉及輔邦餘黨譚琳高黃
明初等竄據東湧海島可喜檄水師進勦琳高就擒亂乃

定逆臣傳

謹案東湧疑當作東涌即今烏涌等處是也粵人呼
水為涌讀平聲與唐韻之余隴切者不同

增城知縣徐鳳來請兵勦綏福雲母各尙寇增城志

東莞旱東莞志

三年春二月增城知縣徐鳳來復請大兵勦綏福雲母清湖
各都尙寇斬獲頗眾然兵來則遁兵去復聚增城志

三月旱冊

宋訪

夏五月續遷近海居民冊

宋訪

續遷番禺順德新會東莞香山五縣沿海居民先畫一界以繩直之其間多有一宅而半棄者有一室而中斷者濬以深溝別為內外稍踰跬步死即隨之舫

徙菱塘沙灣近海各鄉居民空其地為界於石礪山巔築城建塾臺營房縣令彭襄派菱塘沙灣兩司排人戶捐銀

修築民至窳冊

番禺志

是時香山龍眼都小欖古鎮黃圃諸鄉皆徙督遷兵士恣俘掠知縣姚啓聖力爭之乃稍戢初黃梁都民奉遷時民多戀土都地山深谷邃藏匿者眾平藩左翼鎮總兵班際盛計誘之曰點閱報大府即許復業愚民信其然際盛乃

勒兵長連埔按名令民自前營入後營出入即殺無一人倖脫者復界後枯骨遍地土民叢葬一阜樹碣曰木龍歲

塚木龍者甲辰隱語也香山志

時懲於李榮之亂恐遷民仍通海舶當道臨縣勘定海界會潮水大至稻田彌望皆為巨浸署新會縣與都司欲因以為利民無以應遂逼城為界近郭腴田悉為界外民扶老攜幼流離載道見者惻然都司耿光曰於歛界處所置酒為樂遷民貧者行乞街市露宿衢道往往餓死門有死者則署縣經歷李肇豐藉究死因連逮保甲鄰佑貽累多人闔城民卧不安枕逮六月知縣龍之繩抵任即具詳界外海田俟收稻畢方徙遷民始得畧新會志

秋八月撫目袁四都不遵人界潛於新安官富源為巢四

出流劫提督楊遇明合遊擊王失統兵兼同各營兵平之新安

官軍攻清遠沙逕大圍斬賊四十九級活擒黎應科等一十
二名前後捕斬共九十二人清遠志

三水地震三水志

龍門大旱龍門志

冬十一月初三日天鳴如雷六次順德志

順德新會地震順德新會志

十二月二十三日颶賊聚黨劫掠從化追至高灘增城縣駐
防馬成隆城守王國忠協同從化兵進剿以巡檢黨重瓚為
鄉導斬獲甚多重瓚中賊斃死之事聞奉

旨贈主簿增城志

番禺增城地震番禺增城志

四年春正月十八日官軍進剿清遠楓坑等處爐賊攻破水
圍寨共擒斬一百六十四名采訪冊

二月初二日日側有白氣數圈逾時乃散新安志
巡海使者至廣東設沿海墩臺郝通志

自元年以來大臣歲來巡界以台灣未平故也是年前總
督李率泰遺疏請寬邊界其畧曰臣先在粵粵民尚有資
生近因遷移以致漸漸死十不存其八九為今之計雖不
復其室家但乞邊界稍寬則耕者自耕漁者自漁可以緩
須臾死瀕海民至今德之香山志

夏四月南海番禺新會地震南海番禺新會志

龍門知縣楊燁會同守備王著名遣把總范定邦等襲破九

屯峒賊擒賊首羅獻忠唐灣都斬之餘黨平龍門志

五月官軍進勦龍門路溪茅岡陳禾等處知縣楊燁懸重賞

鼓勵士卒殺賊首王裔登等仍傳檄招撫賊眾感泣悉歸服

獲新甯賊首張天乙新甯志

六月新甯賊伍仲雲據金溪里新甯志

龍門旱龍門志

秋八月龍門知縣楊燁副將趙昇雲討西水羊矢坑賊平之
峒賊以次肅清采訪册

先是六月二十一日西水羊矢坑賊首湯舜張子隆等糾
連寒頭大坑各峒賊七百餘流劫長甯翁源總督盧崇峻

阮通志提督楊遇明委副將趙昇雲至縣知縣楊燁前導
作崇峻

深入險阻二十五日與賊戰計斬賊首湯舜張子隆等數

十人賊黨復屯聚深山二十九日入山搜勦分屯隘口賊

眾不得逸八月十八日偵得賊食盡將死戰突圍楊燁與

趙昇雲設伏以待二十三日賊鼓譟而出官軍迎戰甚力

伏發賊潰斬賊首沈章龍鍾日富等十餘人殺賊眾五百

餘人乘勝直擣其穴賊黨平餘盡殲焉於是茅岡路溪陳

禾承清西水及羊矢坑等處賊藪翦除淨盡龍門志

五年春廣州旱采訪册

三月獲新甯賊首伍仲雲平其寨新甯志

夏四月官兵攻新甯圓美兩旬克之獲大盜余富彥平其寨

秋九月三水龍門增城地震三水龍門增城志

前事畧六

冬有雷番禺志

十二月二十一日午刻龍門大雪龍門志

是年海賊襲香山翠微鄉人韋元懿禦之香山志

六年春旱南海志

二月獲新甯龍灣賊首伍道昌平其寨新甯志

夏四月番禺大風六月大雨七月大風雨番禺志

從化地震從化志

時震後大雨巨浸直灌南濠傾圮南門內一帶房屋冲沙

壓田高積丈餘四山崩裂凡處低窪者禍尤酷云四日乃

息從化志

頒禁六大害勒石縣門番禺志

先是巡撫王來任疏陳粵東六大害一夫役二派船三採

買四私抽五攀害六擅殺至是得請勒石禁革粵民稱便

番禺志

大有年三水志

七年春二月有日氣如鎗長十餘丈見西方四十日乃滅番禺志

志

增城賊王國相伏誅采訪冊

夏大水南海志

秋海賊從前山寨登岸攻劫香山果福園副將移駐縣城香山志

八月撤巡海使者復設中路水師總兵於新會新會志

大有年龍門增城志

是年遷民結黨為亂香山志

八年春正月東莞新安潮溢

東莞志新安志

詔復遷海居民舊業

郝通志

先是七年巡撫王來任疏云臣以一介庸流荷蒙

皇上不棄葑菲簡拔茲任才不勝官事多叢脞頃接邸報蒙

部院諸臣考臣不能興利除害奉

旨革任臣負委託實當其辜臣接邸報之日正臣沈疴之時

病勢日篤危在旦夕生還闕下無復望矣而在粵兩載粵

之情形臣頗深悉

皇上孜孜求治臣有真知灼見至死不言不幾仍負罪於地

下乎謹披瀝爲我

皇上陳之一粵東之兵多宜速裁也省會有平藩甲兵與

兩翼總兵官又有城守都司兵丁順德有水提督兵肇慶

有總督兵惠州有陸提督兵又水師左右一路與高雷廉

潮饒瓊等各鎮兵潮州又有續順公甲兵此外各府州縣

又有城守兵丁是無地非兵每年約費糧餉二百四十五

萬本省起存地丁鹽課襍稅等項共計一百二十餘萬尙

需外省輸濟一百餘萬是

朝廷空有之疆土不能有其賦稅而且用他省之銀以養兵

且養兵不守其沿海邊界而盡在腹裏之地兵多更無益

也臣謂國有耗蝕全在於兵而民生困苦亦擾於兵既有

平南雄師坐鎮卽省會之地已得居重馭輕之勢其餘九

府不過聲援犄角酌其要害量設防守如遇小盜竊發城

守一旅便可消弭若山海大寇平藩之師可以隨時調勦

是兵不貴多也廷議不肯減兵者不悉地方情形恐至議

裁兵一旦有事首尾不應不肩其過今粵之山海伏莽已靖所有者不過朝聚暮散鷄鳴狗盜之徒耳兵實貴減也

一粵東之邊界宜速展也粵負山面海疆土原不甚廣今概于濱海之地一遷再遷流離數十萬之民每年拋棄地丁錢糧三十餘萬兩地遷矣又在在設重兵以守其界內立界之所築墩臺樹椿柵每年每月又用人工土木修整動用之資不費公家絲粟皆出之民力未遷之民日苦派辦流離之民各無棲址死喪頻聞欲生民不困苦其可得乎臣請將原遷之界急弛其禁招徠遷民復業耕種與煎晒鹽斤將港內之河撤去其椿聽民採捕海內之兵盡撤駐防沿海州縣以防外患于國不無小補而

祖宗之地又不輕棄更于民生大有裨益如謂所遷棄之地

丁雖少而禦海之患甚大臣思設兵以衛封疆而資戰守今避海寇侵掠慮百姓之資盜糧不見安攘上策乃縮地遷民棄其門戶而守堂奧臣未之前聞也臣撫粵二年有餘亦未聞海寇大逆侵掠之事所有者仍是內地被遷逃海之民相聚為盜今若展其界邊卽此盜亦賣刀買犢矣舍此不講徒聚議以求民瘼皆泛言也 一香山橫石磯口子宜撤也當年遷立邊界之時以香山必不可遷議設官兵防守此土香山之外原有澳彝以其言語不通不事耕種內無駐足之處况居香山數百年遷之更難時已奉命免遷矣是縣與澳皆為內地也所宜防者防其通外海耳當時奉行者反於橫石磯立一口子曰食米糧計口而授每幾日放一關其一切用物皆藉奉禁稽查留難皆不合

出計縣與澳其戶口數萬斷絕往來生業坐養致困愁苦
難言若論其地未遷則為界內之人其橫石口子似宜免
設使其人得以貿易於內以通有無惟於澳內設兵防其
通海接濟庶幾民彝可以長活若仍立口子雖云計口有
米糧出糴彼他方之人既絕生計何處有銀買米臣謂不
數年則其人皆枯槁矣以上三事皆功令之所甚嚴諸臣
之所忌講臣屬橫之際瀝血遺言雖生不能報國死猶可
以無憾也伏乞

皇上敕部議覆施行至是奉

旨依議新甯志

巡撫王來任卒于粵遺疏極言其狀及御史楊雍建條奏
詔可之遣都統特某副都統魯某戶部侍郎雷某會同平藩

尚可喜總督周有德巡勘議撤排柵改設各汛墩臺郝通志

新會雨雹新會志

八年夏六月大颶風至八九月凡三作吹落六榕寺塔頂南海志

秋七月一日有三龍二白一黑自新安西邊海飛至城南而

去民房椽瓦捲去甚多新安志

參將趙失名率兵勦新會官田長沙諸賊采訪冊

初官田諸山劉保餘黨劫掠肆行藩院歲發兵至則逗留
邑城悉索夫役賊皆先遁民有賊梳兵櫛之嘆至是趙參
將徑搗官田連破梁經玉李山官七諸寨救出被擄男婦
一千三百四十餘口遽稱班師賊不為備八月十三日疾
馳長沙襲擒賊首鉄爬沙劉萬多等三人奪回被擄男女

又數十餘口民皆引領企其滅賊俄奉撤回新會志

九年秋八月番禺星隕有聲如雷番禺志

大有年南海志

是年新會賊劫陳冲屠其族倚為亂藪天湖聖陳基勝等招集義勇請官兵修舊營立新營以拒之時開平賊首余村余富潤聚眾數千欲過平逕東掠羅坑小岡城西諸鄉遣謀賊欵來假道于天湖聖基勝等弗許勗族人暨義勇立十三營為犄角計賊卒不敢過自九年至十七年凡九年亂乃定新會志

十年春廣州大有年采訪冊

二月十一日新安颶風大作民房吹毀甚多牛羣俱吹落海新安志

尙可喜疏稱有疾請令長子之信代理軍事

詔如所請貳臣傳

十一年廣州大有年采訪冊

夏五月清遠潦水漲發壞田廬甚多清遠志

新會有虎患采訪冊

新安紅花嶺白氣復見如前新安志

秋七月有龍見于從化獨石潭從化志

九月臺灣巨逆李奇等率寇船流劫新安地方游移蠓涌登岸屠掠知縣李可成遊擊蔡昶統集鄉勇官兵協力擒勦賊潛遁瀝源等山李可成旋督兵搜捕盡行擒殺地方始甯新安志

十二年春三月尙可喜疏請以兩佐領甲兵及藩屬孤寡自

歸老遼東海城部議令率諸子藩屬十五佐領悉移歸貳臣傳

夏五月二十一日新安颶風作海潮大溢沒屋浸禾知縣李

可成爲文祭之新安志

冬十二月戶部尙書梁清標至廣州番禺志

聖祖仁皇帝以三桂可喜宣力有年年且老且三藩分布半

天下將成唐室方鎮之勢非久安計欲令釋兵還朝以全

終始銷亂萌適可喜疏請乞骸骨率所部歸遼東乃特允

其請三桂精忠不得已亦以是年七月疏請撤兵而實無

行意朝議分遣哲爾肯陳一柄梁清標赴諸藩與籌撤兵

後事宜且趣之行三桂遂發兵反皇朝武功紀盛

十一月逆藩吳三桂反貳臣傳尙可喜傳

詔停撤藩仍留鎮

十三年春二月香山雨雹香山志

三月逆藩耿精忠反潮州總兵劉進忠應之可喜合其子之

孝率兵討進忠滿漢名臣傳

先是可喜欲以長子之信襲其平南王爵至是惡之信酗

酒嗜殺因疏陳之孝律已端慎馭下寬厚堪嗣職

聖祖仁皇帝命之孝襲封平南王之孝畏之信啟巡撫劉秉

權爲之奏辭部議合可喜如舊理事俟賊平以之孝襲同上

夏六月二日東莞潦潮暴漲平地水深四五尺東莞志

新甯颶風壞官民舍新甯志

秋新會賊李山官七流劫南海鼎安都各村巡撫劉秉權發

兵擊之南海志

九月十六日厓門海中出煙一道疾衝縣西北方逾時乃散

新會志

冬十月平藩左翼總兵班際盛水師總兵張偉率兵勦新會

官田賊不克新會志

時以李山官七祖籍六洞屠六洞村以梁經玉所棄之妾在河村屠河村遂及馬洞張偉又乘機掠數小村可喜以際盛殺無辜繫之獄王子尚之信為請出之新會志

十四年春正月封尚可喜平南親王貳臣傳

三月香山雨雹香山志

夏五月增城大風拔木增城志

偽周兵犯清遠清遠志

冬十月聞西寇馬雄將至新會戒嚴采訪冊

西寇馬雄既陷高州與總督余光祖相持余崗羣盜四起

響應日謀犯城及余崗兵潰賊勢漸逼城外居民盡逃冬

十月水師總兵張偉藩下總兵班際盛先後率兵入城防

守新會志

冬十一月盜圍廣海衛城三日乃去新甯志

十二月新會土賊李山官七等擾縣城采訪冊

西寇馬雄將至土賊李山官七梁經玉等謀攻邑城賊眾未集是月十五夜其黨張斌等遽以數百人從寶城樓踰

城入奪西山礮台據之把總陳龍德守馬山首刃一賊千

總林達繼之殺賊甚多復據西山千總張雄率兵巷戰賊

勢不支乃踰城出十六日總兵張偉開城逃偉兵大掠民

居百姓見偉走亦挈家出偉盡驅其婦子以去至江門遇

總兵孫繼宗詰之偉誣城內盡叛逐之以出時土賊尚屯

分水江待眾賊至將復攻城城中惶惶乃與知縣王家啟謀往江門請援時已入夜李英陳吳昌武舉譚福梅監生李梓芳生員黃中雀葉嘉鄉民余爾宣等數十人挺身繼城下趨江門哭請於孫繼宗張偉猶在坐言請援人為賊孫不直之乃發馬甲三百馳救時賊已合圍不意有兵遽前擊之賊眾大敗斬數百級城幸獲全張偉復入城內殺無辜數十人

新會志

十五年春吳逆合偽將馬雄等攻新會平藩遣標員謝厥扶等以舟師禦之厥扶陰自納款平藩子尚之信以被廢不得志矯父命與賊連和

郝通志

西寇馬雄至杜院耀兵於圭峯諸山二月十六日尚之信接兵出自韋涌聞江門水師已變踉蹌而還初雄本廣西

提督吳三桂反叛降之受偽伯爵三桂命之東犯陷高州與總督余光祖相持余尚兵潰雄遂長驅而下欲破新會以攻廣州所過土賊從之

新會志

時藩下水師參將趙天元率諸水軍控扼江門是月十五日天元遂劫諸將叛降馬雄於是新會援絕防守總兵張偉城守遊擊芮夢龍亦以新會降賊

新會志

三月一日偽糧道耿文明遣役催餉民不肯輸文明因指村民為逆馬雄遽發兵殺擄七堡小岡大凹潭墩等數十餘村新化遵名石碑潮陽潮居諸郡男婦被殺者數千被擄者數萬時有天臺村民以大義相鼓勵築壘禦賊相持者十日殺賊數百賊懼呼之為蓮花寨後以力竭村陷殺擄八百餘人雄旋撤師往肇慶

新會志

時馬雄餘黨入龍江焚掠烈女蔡慶娘罵賊死之二月二十三日雄黨蔡羽榮復至龍江擄劫二十四日劫龍山仙

塘旺村所至焚掠順德志

海寇南沙七趙天元劫增城西洲屠黃埔復圍沙貝村弗克

解去增城志

夏四月新甯林亞祐劉嘉豪李茂奇甄參相盜起新甯志

五月朔撫賊陳器瑜率海寇攻香山知縣申良翰副將白色

先禦之十二日援兵至賊始遁香山志

冬尚可喜卒南海志

可喜卧疾之信代理事三桂誘藩屬從逆水師副將趙天

元總兵孫楷宗相繼叛之信遂降三桂遣心腹環守可喜

藩府戒毋得聞白諸事授偽職招討大將軍輔德公奪之

孝兵柄使閱居廣州三桂屢脅之信出庾嶺抗大軍之信

賂以庫金十萬兩乃已可喜卒三桂以輔德親王偽印與

之信之信旋遣使赴江西通款大軍密疏願立功贖罪臣逆傳

傳

是年海賊自惠楊入寇新安所過鄉村盡行屠掠遂踞縣城

次年始克恢復民獲安堵新安志

十六年尚之信反正襲封平南親王順德志

之信請

敕大軍速進粵是時三桂以董重民為偽總督踞肇慶初

戶謝厥扶當趙天元未叛時先以繪船數百附馬雄誘天

元從賊至是三桂令厥扶統轄水師加偽職定海將軍與

重民合拒大軍之信密約重民所部兵令以缺饟謀乘間

擒重民邀擊厥扶大敗之厥扶遁入海之信遣副都統尙
之琰率兵迎大軍疏陳闔屬歸正得

旨嘉獎之信襲封平南親王逆臣傳

夏五月新安虔龍山有白氣如前新安志

秋七月海寇鍾吉生夜劫香山翠微村把總鄭九琨死之香山志

八月二十夜廣州大風驟雨拔木壞官民衙舍風雨中有火

光采訪冊

冬順德水軍鼓譟滋事邑城瀕危知縣時應泰請兵捕之順德志

十七年以之信為奮武大將軍進定廣西逆臣傳

時孫世琮寇擾南甯之信既次橫州俄復退還廣州自陳

患痔日劇有事醫療逆臣傳

夏番禺地震番禺志

三水新甯大水三水志 新甯志

冬十二月官兵勦新甯賊劉嘉豪李茂奇林亞祐已而賊遁

遂平其巢新甯志

香山有虎至香山志

十八年春二月新會雨雹潮陽潮居二都壞民居一千餘家

新會志

秋八月香山颶風香山志

九月南海蝗南海志

新會官田等處土賊乞降采訪冊

初新會各山賊張酒尾等以百峯山為巢穴劉保等踞官

田黑坑諸山黃元沛黃元述劉萬啟等踞古兜與保黨梁經王李山官七等為犄角殺擄男婦以巨萬計而官田一山綿互數縣古兜百峯前臨大海道路險阻人跡罕通往往兵集則遁兵去復出勦撫數叛至是生員林宜遂等赴兩院及嶺南道陳請始設兵分屯要害賊窘乞降總督吳興祚遣兵捕賊首黃元沛等誅之兩都之民始獲安枕新志

康熙間土賊亂諸鄉被劫天河譚敬簡譚翔千等首倡子姓義勇上登雲山立望樓扼要害悉力禦之井里獲安賊尤恨敬簡遂中賊毒卒族人哀而思之與翔千歲時奉祀新會志

十九年春正月增城大風增城志

三月刑部侍郎宜昌阿巡視海疆合總督金光祖提督哲爾肯副都統金榜選總兵班際盛協擒之信逆臣傳

初尙之信雖降仍懷兩端趣其按宜章按韶州按梧州皆托故不行三桂死始聽調從征廣西至是之信護衛張永祥張士選赴京首其謀叛事

上命侍郎宜昌阿以巡海為名赴粵密按其狀部將王國棟證之事皆實宜昌阿密檄金光祖執之信於武宣之信弟之節等在省城聞變殺國棟欲為亂將軍賴塔以兵圍其第皆就擒之信尋伏誅粵東得不擾皇朝武功紀盛

海寇謝昌犯順德縣城及倫敦鄉又犯香山海洲采訪冊謝厥扶為順鎮康熙十五年二月尙之信叛附吳三桂三桂合將馬雄攻新會厥扶與藩標趙天元以舟師禦之二

人陰自納款之信亦矯父命與賊連和天元標員黃有功
大掠番禺厥扶使其子昌殺之天元訴于雄與厥扶相攻
之信助厥扶餉先是十四年平藩使高州鎮祖澤清協勦
潮州叛鎮劉進忠澤清遂據高州叛至是澤清聞之信反
正請殺厥扶贖罪厥扶遂為海盜既被殺其子昌復縱橫
海外以海陵為巢穴順德志

夏五月二十九日黎明海寇突入新安西鄉大涌二處劫掠
至晝乃退新安志

六月初一日賊泊白石海沙江沿劫新安厦村一帶惟鷄柏
嶺一砦力拒數日賊百計攻陷屠戮無遺僅存在外者二三

人新安志

秋旱南海志

新安多虎傷人甚眾年餘乃止新安志

二十年詔遷尚逆家口於遼東皇朝武功紀盛

秋九月旱南海志

二十一年夏六月詔除尚之信苛政凡佔奪鹽埠勒索渡稅
私抽貨物重斂漁課悉行酌免皇朝武功紀盛

冬十月獲新甯賊首蘇華吉平其寨新甯志

十二月遊擊嚴成世勦新甯盜新甯志

成世之治盜也分別良慝民無擾累先是肇防廳周宏啟
守備王起鳳聽盜誣指良民重足至是始安新甯志

二十二年春三月新甯坪山鄉夫誅賊首林亞祐新甯志

夏四月遊擊嚴成世獲新甯賊首劉嘉豪李茂奇新甯志

八月二十夜狂風地震南海黃鼎寨邊岡裂八十餘丈南海志

冬大雪霜樹木多枯死南海志

二十三年春二月弛海中五島禁新甯志

以海氛永靖內差大臣及督撫兩院臨縣開復原額漁課

並許各海口貿易也新甯志

三月命展元年遷海界新會志

自十五年尙之信叛從吳逆遂開界墾荒令民耕蒔十七

年催收王庄稅穀十八年縣寨官兵督遷焚寮刈稼十九

年縣徵前十八年虛稅追呼不堪命至是民歸故土地方

官令民插標清丈民始安業香山志

大有年南海志

香山旱朱訪冊

二十四年春秋旱冬歲歉李梅實南海志

是年置花縣南海志

花縣地連南海番禺三水清遠從化縣之交盜賊擄劫公

行屢勦復起紳民黃士龍呈請設縣巡撫李士楨於康熙

二十一年疏聞部覆未允二十三年戶科給事中王又旦

典試粵東復命疏陳設縣治奪盜淵藪始報可南海志

巡撫李士楨奏疏云題為花山積盜年久未淨特請設治

立伍一勞永逸以奠巖疆事竊照廣省花山一帶地方為

番禺南海三水清遠從化英德增城等縣錯壤交界之所

綿亘五百餘里歷代以來向為藏奸之藪自逆藩尙之信

僭竊以後擅立王庄名色分佈黨徒占踞田土因有本地

奸人憑依而附和之聚為盜賊劫掠公然莫敢過問當逆

藩伏法時幾至交結為亂後經前撫臣金雋與提督臣侯

襲爵遣兵進勦先以報

聞但緣此地深山疊嶂茂箐密林潛藏叵測歷有年所勦則逃遁而踪跡難追撫爲故事而間或復合以致根株未能盡淨迄今仍復竊發據番禺縣里排胡承璉畢眾興等呈開賊首雖已就擒餘孽尙肆荼毒現今賊夥黃盛和江伯興等見住車頭整屋源水柴等處招集亡命謀作非爲呈懇速調防守生靈攸賴等情又據士民黃士龍陸其磨徐觀光畢士進等條陳謂花山地方延袤其間地名有車頭整曹洞沙帽嶺屋源水正逕鍾村沙蜆三扶田黃竹湖塘舖等處率皆萬山重疊路徑險僻自古及今積賊難除若淨盡根株必須專設縣治佐以師旅於適中之處控制要害庶爲久安等因臣思花山爲粵省廣州府之靠山相距

不滿百里而山之西北南三面又爲官民商賈孔道圍繞而行五百餘里數十年來劫掠不時行旅避之百姓畏之因卽會商督臣吳興祚提臣侯襲爵選委驛鹽道僉事李毓棟帶領廉州府同知李文獻臣標右營遊擊岳鳳彩帶領效用各官標營兵丁乘此農隙之時前去萬山之中相度形勢要害山口或兵百名或五六十名劄駐又通行環山七縣印捕各官從頭清查編立保甲其中查有盜賊之徒頑野之輩或緝拿法治或甲長收管或安插食糧則一時盜賊消弭而地方得以甯謐但善後久安之策誠如番禺縣士民之條陳必需專設縣治於適中之地控制要害且其山遼曠深遠水土肥饒割數縣通糧之地招山野愚頑之人建城而守設官而治久安長治之道莫善於此併

設營汛約官兵八百員名以遊擊領之協同彈壓則道路漸闢荒山漸墾人烟漸多戶口漸增盜賊自漸息矣且花山逼近省會自此而省會重地可保無虞周圍沿山大路自此而商賈行旅坦坦周行可無戒心嶺南一帶長得廓清矣此臣一得之愚為地方起見如蒙

允行當此軍需殷繁之日錢糧亦不取之公家其城垣且需土築藉周圍各縣之民力可成其城樓堞口公室廟貌營房議於本省開照各項捐納事例一年不煩別措而功可成矣臣謹會同兩廣督臣吳興祚鎮守廣州等處將軍臣王永譽副都統臣巴喀拜音達禮廣東提督臣侯襲爵合詞密題伏乞

敕下該部查照議覆施行花縣志

給事中王又旦奏疏云題為嶺南之積盜甫清善後之良圖宜計臣見聞所及上瀆

天聽以佐萬年甯謐之治事竊惟粵東地處嶺南峒賊出沒嘯聚無常番禺清遠從化三縣之間悉皆崇山峻嶺喬木茂林焚劫時聞水陸交困兵來賊遁兵去賊來勦撫無功良非一日兼之孽藩庇護肆毒更甚我

皇上天威遠播赫怒削平近來於花山設營防禦百姓始甯享生全之福臣奉

命典試茲地博採輿情細察民隱知花山雖屬一隅而中通數省盤立五十八崗鳥道四達為南方最險之區其中百扶田白鷺逕正逕等數十餘處皆匪類倡聚之所此時雖各就撫而根株未清誠恐法久漸弛厝火復燃莫若於三

縣交界之地設立縣治得地方官與營將互相彈壓庶蠻性可以漸馴約畧言之其便有三番清從三縣之界賊黨踞巢而負隅之徒每每藉盜通糧今設一縣而前弊除矣其便一尚中田畝既為賊踞盡皆報荒有一縣令導化之賣劍買牛田畝日墾國賦日增其便二營將之守禦以制其力而縣令之撫字以革其心叵測漸消久而彌固其便三至於營建城池衙舍諸費該督撫細心設法勸諭不致有虧正項地方之人昔受剝膚之害未有不忻然樂趨者臣查康熙二十一年廣東撫臣李士楨亦曾以設縣上請部議未允在部臣不過謂置役設官易滋煩費而不知土拓戶繁實益

朝廷臣於撤棘之後見彼地土民諄諄以一勞永逸之計相

告臣思諮詢地方利害入告我

后臣職分當然所以不敢緘默也伏乞

皇上勅部確議利於民即便於

國南天永弭難化之患矣花縣志

二十五年夏四月新安大水新安志

時淫雨連日傾注縣城高處山麓而汎濫洶湧渠不能洩亟開西南二門放水勢猶未減民居盡頽場人民冒雨四散投生上下洶洶不得已乃決城堞二處消水水勢始平人心稍定城西西鄉村衝決民房百餘間皆漂流入海西北路燕村水貝涌頭黃松岡等處涌決土寨民房不可勝計居民皆升屋上縛竹木為筏桴浮水而渡往往溺死牛畜淹沒甚多城北新圍村土寨水環丈餘居民亦皆以木

後渡水而走北路竹村一帶衝決亦如之新安志

秋八月十五新安雨雹如彈大秋旱禾稻無收新安志

二十六年二月多雨四月颶風淫雨傷禾稼南海志

夏五月二十六日午後古朗吉祐逢簡光華連近諸鄉忽驟

風雨雹天地晦冥咫尺不辨迅雷從地起凡三十二處震死

男女共八人拔樹破屋二十餘處順德志

二十七年增城大有年增城志

二十八年夏四月從化大水從化志

四月初三日平明大水入城東門自南門而出城廂民舍

舖店淹沒殆盡知縣郭遇熙甫下車即詳報上憲開倉賑

濟存活二十餘家淹死男婦一十三口悉捐施棺木瘞埋

從化志

香山大有年采訪冊

二十九年冬十一月從化霜雪降從化志

霜雪屢下樹葉盡枯果木殺傷甚眾明年荔枝不熟春夏

大旱從化志

三十年春不雨五月乃雨三水志

三十一年大有年南海志

三十三年夏大水免被災錢糧三分之一南海志

三十四年夏三水大水三水志

是年靈山人石蘭上聚眾為亂增城知縣任光業請兵討之

增城志

三十五年春三月石蘭上伏誅增城志

米貴一斗百錢順德志

廣州府志 卷八十

三十六年廣州饑采訪冊

夏六月香山颶風大水香山志

三十八年秋征連陽八排撫兵回至三水作亂總兵呂孝德

率兵追至左田擒之三水志

香山大雨雹折樹倒屋采訪冊

三十九年增城大水增城志

四十年夏五月大水免被災錢糧三分之一南海志

四十二年香山疫采訪冊

四十三年夏大水賑濟免錢糧三分之一南海志

四十四年夏五月初六大風雨清遠金芝巖龍出金光閃爍

雲氣擁護惟見一尾曳地清遠志

四十五年夏三水大水決堤三水志

六月十四日暴風潦漲平地水深五六尺東莞城東南隅民

居多圮東莞志

秋九月艚船入糴米貴將軍管源忠禁之價乃平番禺志

冬籐竹盡花增城志

四十六年夏香山增城大水香山采訪冊增城志

四十七年新安大饑新安志

四十九年大有年南海志

五十年秋七月香山颶風香山志

五十一年夏四月清遠大水有大魚逆流至峽上八月颶風

害稼清遠志

秋八月颶風海水失潮一日夜溪港皆竭番禺志

五十二年廣州饑采訪冊

五十三年夏新會大水新會志

香山疫采訪

五十四年香山旱采訪

五十五年夏六月香山旱有大星隕於東南方采訪

五十六年秋七月十八日東莞潮溢隄岸民居盡毀東莞志

冬十一月香山地地震香山志

五十八年冬十月雷鳴香山志

六十年春正月冰夏五月大水三水志

冬十二月十二夜雷鳴清遠地震有聲清遠志

香山雨黃沙雹如拳采訪

六十一年春正月三水雨雪竹有實三水志

秋九月颶風香山平嵐諸鄉民多溺死香山志

冬十一月大雷順德地震順德志

香山雨雹香山志

南海譚宗浚分纂 南海梁 起初校 順德盧乃潼再校
番禺史悠履三校 順德羅 槩四校
廣州府志卷八十終

廣州府志卷八十一

前事略七 國朝

國朝

雍正元年大有年南海志

新會土賊張祖珠馮玉榮等嘯聚官田總督孔毓珣擒誅之

新會志

夏五月香山颶風大雨香山志

三年夏四月西江水溢各縣蠲賑南海志

香山桃李冬實香山志

冬十月雷采訪冊

四年春二月不雨夏四月始雨從化志

米價如上年賑之而安順德志

五年東莞大水斗米三百錢東莞志

三水增城清遠饑采訪

六年廣州大有年采訪

三水雨雹三水志

七年令廣東蠶戶聽其登岸居住設約正於舉貢生監內擇老成有學行者充之番禺志

廣州大有年采訪

八年廣州大有年采訪

禁西洋海船毋得販黃金出洋澳門志

夏六月英吉利兵船闖入獅子洋采訪

先是洋人英吉利者頻年與呂宋構衅外洋八年六月呂宋兵敗英人將歸獻俘被颶飄二戈船入獅子洋英人素

剽賊明時屢入粵求市恃其巨礮發之可洞裂石城震數十里卽世所傳紅夷礮者時遠邇驚詫大府遣東莞縣印光任奉檄往勘至則英人以饑乏乞濟其酋安心意殊狡黠光任反覆開陳大義安心悟釋呂宋俘由澳門伺便還國凡二百九十有九人然後爲之給廩餼葺帆櫓嚴周防至九月風便乃去澳門志

九年夏六月清遠水漲平地水深二丈許清遠志

十年毀天主教祠遷其人出居澳門番禺志

夏六月英吉利兵船闖入雞頸洋采訪

時偵報雞頸有英人三船詭言將往日本貿易不數日又有三船至澳門同知印光任聞於憲調集巡海舟師分布防範越八月初九日皆升帆若遠揚狀俄而佛狼西來告

亟光任偕統巡香山協副將林嵩令各營哨船一字橫截海面且遣澳門夷目宣諭威德會薄暮西南風作弗郎西三船疾駛入口英人計沮乃逡巡罷去澳門志

秋東郊產嘉禾新甯志

總督鄂彌達進瑞穀一萬八千穗一莖自雙穗以至七穗一本自十數穗以至一百二十九穗其長至有一丈一尺者知縣王嵩繪圖勒石新甯志

增城大水增城志

十二年冬十二月清遠地震清遠志

十三年春二月那扶出醴泉新甯志

十七日夜海晏那扶萬頃洋尚心田中忽聞響聲似雷鳴遠望有氣若雲霧上騰天開一池清水潑洄其味甘美海

挫場大使揭世琳巡檢袁相以聞督撫委廣糧同知胡廷琪查驗復委雷州知府王鐸候補副將謝雲覆驗其池圓六丈六尺以繩繫石探之淺者九尺深者一丈三尺督撫以聞新甯志

夏閏四月增城大水增城志

乾隆元年春二月大雨雹南海志

雍正間外賊王扁嘯聚黃楊山乾隆初捕誅之香山志
謹案香山志有此條不載明某年今附記於此

大有年香山志

二年春二月新會大雨雹新會志

龍門饑龍門志

夏颶風南海志

秋七月大雨街道水深三尺南海志

冬十一月二十六日雷電大雨龍門志

三年夏五月三水榕塞圍決樂塘圍漫溢三水志

五年冬十二月二十四日大雷南海志

大有年香山志

六年夏五月旱米穀貴南海志

八年冬十二月初六日丑時大雷電風繼以雨順德志

十一年春三月南海地震南海志

夏五月番禺三水增城地震番禺志三水志增城志

十二年夏四月二十五日申時順德潭村狂風迅雷大作樹

木盡拔倒屋十餘間壓斃三十餘人順德志

五月增城大水增城志

十三年大有年香山志

十五年冬十二月增城大雨雹增城志

十六年自三月不雨至于五月增城志

夏五月有五色鵲集增城學宮三日增城志

十七年新會增城饑米貴新會志增城志

秋八月二十九日至九月一日新甯颶風大雨壞壇廟祠宇

新甯志

八月大水九月復大水增城志

冬十二月東莞茶山貢生王亮臣作亂龍門志

東莞王亮臣莫信豐等糾合匪徒謀不軌沙貝村湛舉大

湛佐一等聚眾應之期以十二月癸卯祭旗于華峯之北

將肆劫掠入藍糞山盤踞知縣管一清及各營汛聞風查

肇亮臣中道遁去衆潰佐一亦遁舉大走死擒其羽黨窮治之巡撫蘇昌率師駐增城與巡道楊滙設方畧購捕各縣賊總督阿里衮提督胡貴得報亦馳至率同布政使石柱署廣州府事李璜督官兵深入搜山先後獲賊二百餘人人情大定增城志

十八年春誅賊首莫信豐等三十餘人并戮湛舉大屍增城志

三月首逆王亮臣及湛佐一等次第就獲伏誅增城志

夏五月增城穀貴平糶增城志

秋有年增城志

二十年夏五月東莞大雨水民居多圯東莞志

二十二年春正月十五夜霜厚尺許是年米貴新安志

秋七月颶風暴雨竟日南海志

二十三年正月有雪南海志

歲饑斗米三百餘錢東莞志

三水疫三水志

二十四年香山疫香山志

二十五年秋八月初九日新安颶風新安志

二十六年秋八月初十日新安颶風新安志

二十九年夏四月北江水漲南海志

五月清遠大風雨黑雲自南而北自辰至午水高數丈倒塌

廬田無數男女多被壓死清遠志

冬十二月南門災番禺志

三十二年夏五月東莞大風折木東莞志

三十三年夏五月初七至十三連日大雨如注新安志

秋三水有螟食禾幾盡三水志

廣州饑采訪冊

三十四年春淫雨大水三次番禺志

三水大饑竹有實三水志

三十五年夏閏五月廣州大水采訪冊

秋七月新安地震新安志

三十七年秋七月二十日颶風大作南海志

是年新安狼虎成羣傷人甚多新安志

三十八年夏五月大水海漲潮浸城十餘日不退南海志

六月東莞淫雨浹旬平地水深五六尺民房市店多圯東莞志

冬十二月初十夜五更雷南海志

四十年夏大水清遠志

四十二年新安大旱米貴人多餓死新安志

四十三年廣州饑采訪冊

夏四月清遠水溢至五月十三止清遠志

秋清遠水亦屢溢低田失收清遠志

四十四年五月水桑園圍潰壞民屋甚多南海志

時三水魁岡圍及良鑿金西蜆塘龍池各圍均被冲决采訪冊

秋八月清遠水溢低田失收清遠志

四十五年巡撫李湖獲沙菱巨盜二百餘人真之法番禺志

沙灣菱塘近接大洋素稱盜藪假風便捕魚出洋肆劫或
標掠內地有以被盜告者官輒令改竊盜益恣湖下車訪
盜姓名居址偵知盜首以七月望前歸家設祀密飭文武

官分布兵役旬日間獲誅巨盜二百餘人疏聞

詔嘉之條奏安輯事宜十款下部議行嗣是沙菱稱治李湖傳

四十六年夏三水龍門清遠大水壞田廬無數采訪冊

秋斫竹花而實三水志

四十七年春二月十二日清遠雨雹夏大旱十月上旬水溢

低田被浸清遠志

四十八年夏清遠水溢清遠志

六月初一日新會城颶風暴雨平地水滿六尺新會志

四十九年夏五月大水南海桑園圍三水婆角圍潰害稼傷

人壞屋踰月水退采訪冊

東莞清遠大有年采訪冊

冬十二月八日江門舊椰街災延燒舖戶一百餘間死三人

新會志

五十年清遠旱清遠志

五十一年廣州旱大饑斗米五百錢采訪冊

冬十二月三十日新會雨雹新會志

五十二年歲復饑民多餓殍采訪冊

二月清遠連日雨雪牛多瘟疫清遠志

五十三年春二月三水清遠連日雨雪三水志 清遠志

三水新安雨雹三水志 新安志

自九月不雨至于十二月增城志

五十四年春不雨斗米銀三錢新會志

夏六月增城地大震增城志

新會大水新會志

廣州府志卷之十一

五十五年秋增城旱增城志

五十六年夏五月廣州大水基圍多決采訪冊

秋七月三水西南災燬舖店一百餘間三水志

颶風屢作新安志

八月新會地震新會志

九月三水增城旱三水志增城志

五十七年秋七月二十一日颶風大作艚船漂上岸水溢入

城壞民船傷人無算各坊表衙署桅杆俱倒番禺志

清遠大雨水清遠志

八月增城旱增城志

五十八年秋九月十八日新會城外河北災二十日江門河

船災燒船三百餘隻民赴海淹死者無數冬十月十八日城

外河南災延燒舖屋四百餘間二十九日新開濬災新會志

是年海賊圍新甯縣丞大澳行署新甯志

五十九年春三月三水雨雹三水志

增城大旱增城志

夏五月大水桑園圍潰害稼傷人壞屋秋九月水乃退南海志

增城大旱增城志

六十年饑南海志

閏二月東莞新會三水增城雨雹東莞志新會志三水志增城志

夏四月增城大水增城志

五月二十三日大星隕于新會新會志

秋八月增城大旱增城志

嘉慶元年五月初五日夜星隕如斗光芒有聲自東南流西

北新會志

六月朔西潦至颶風香山志

二年六月颶風拔木閏六月颶復作大水冲田廬無算增城志

九月龍眼有花新會志

三年饑南海志

四年夏六月大水三水志

大有年增城志

五年海寇至浪白人桅甲門總兵黃標督舟師追獲甚眾外

洋稍靖香山志

三水地震三水志

夏五月颶風拔木香山志

六年五月大水蝗龍門志

八月十四日颶風大雨水壞新甯西門外墟新甯志

七年春竹生花成實竹本盡枯新甯志

三月香山雨雹香山志

英吉利來兵船六泊雞頸洋海國圖志

英吉利淹留數月有窺澳門意協辦大學士兩廣總督吉

慶飭洋商宣諭回國以是年六月去去之日特遣人陳請

謂佛蘭西欲侵澳門故輒舉兵來護訛言請勿輕信意將

以掩其迹也會西洋人索德超等居京師者言於工部侍

郎管西洋堂大臣蘇楞額

上聞馳詢吉慶以英人開帆日奏事遂寢海國圖志

八月博羅陳爛屐四聚眾羊屎山為亂增城志

九月陳爛屐四竄匿羅浮山尋又竄匿增城流杯崗被官兵

搜獲伏誅增城志

惠州會匪亂延及廣州香山四大兩都隆都古鎮所在皆有而黃梁都尤甚巡撫瑚圖禮欲夷之知縣許乃來設法擒其魁黨遂散是役也新會兵乘機肆掠指民為盜守備曹某者虐尤甚許乃來鞫得實盡釋之香山志

是年博羅羊矢坑賊陳爛屐四謀亂其黨甚眾蔓延龍門河源長甯等縣龍門知縣師保元諭各鄉紳士獲盜即斬無庸解送命長子先甲家人范二從千總某往鰲溪大陂等處堵禦時賊黨潘亞穩鮎品黃塞鼻老將六等千餘潛踞蓼溪之石塘受爛屐四密約中秋夜犯縣城監生李珍先期探聞之即與族人步坑會六約壯丁輪守各隘詣縣請兵勦捕八月十二日兵尚未至珍等見事急親率壯丁

赴石塘焚勦俘斬過半謀主黃某亦被擒餘黨遂散龍門志

陳爛屐四之亂路溪一帶皆戒嚴紳士沈日躋等督率鄉民擒賊黨羅璫韓福旋會同營弁曾明貴赴鄧屋坑破賊

巢穴龍門志

颶風水漲壞新甯城垣有淹死者新甯志

新會賊劫掠沙堆古井等處新會志

八年癸亥正月竹生花新會志

歲饑新會志

署提督魏世斌殲賊于大小虎浪白諸處采訪冊

會匪餘孽遁外洋遊掠大小虎浪白諸處清明醉失曙復大霧不見人署提督魏世斌帥師驟至擊殺之殆盡餘黨見水走文樓山虎山人素受其害聞礮聲截搜五十餘

人香山志

秋八月有紅氣圍繞花縣了髻山由尖峯而上良久方沒采訪冊

十二月增城賊關念宗何龍佑伏誅增城志

先是十一月縣民關念宗客民何龍佑等聚眾于白狗翼

將肆劫掠知縣于潛修會營查拏賊稍潰散竄匿梅都樟

峒守派潭汎千總葉顯揚率汎兵并招集民壯百餘人乘

夜直搗樟峒斬獲甚眾念宗等遁去至是伏誅增城志

八年十二月增城大雨雹增城志

新會荔支龍眼有實新會志

九年春二月二十二日外海陳明剛通海賊劫掠外海鄉守

備曹守仁觀望不進在籍侍衛陳大英督鄉人捍禦至二十

四日賊始去新會志

夏四月清遠大水清遠志

初九日夜新會棠下獲會匪廖宜漢等六人于圓坑新會志

坑為新會鶴山兩邑之交賊黨挾仇圖復于是棠下戒嚴

約賊至以鳴鉦為號有違約者眾即攻之未幾賊黨梁修

平二十八人悉被擒梟于鶴山縣之沙坪墟新會志

秋海寇劫香山百蕉村鄉人力拒之香山志

是年霪雨少晴終歲見太陽僅四十餘日龍門志

郭婆帶鄔石二鄭一等流劫海洋掠新安屏山固戍榕樹角

灣下等處新安志

粵東海寇時起時滅由來久矣乾隆中安南阮光平作亂

國主阮王死其子福映年尙少有大臣正衛蓋者正衛官名其名

日挾之出奔暹羅光平既得安南又攻東京安南二王阮王治順化龍

蓋等處黎王治東京賴等處黎國主黎維祺走廣西光平乞內屬許之五十五年人觀國已定矣嘉慶六年福映既長借暹羅兵復國并有東京改號越南彼國年號嘉隆光平之子與其臣麥有金遁出

海海賊鄭七吳知青等附之封鄭七為大司馬鄭七有船二百助光平之子返國十二月福映與戰屢敗鄭七遂據

安南港虐其民民怒潛約福映夾擊之鄭七大敗中礮死從弟鄭一領其眾劫掠海上水師總兵官黃標屢敗之標

沒後海賊紅黃青藍黑白諸旗蜂起吳知青號東海伯黃旗李宗潮附之麥有金號烏石二藍旗其兄麥有貴弟有吉附之以

海康附生黃鶴為謀士郭婆帶黑旗馮用發張日高郭就喜附之梁寶號總兵寶白旗李尚青號蝦蟆養青旗鄭一紅旗又有

閩賊蔡牽為之聲援海寇愈熾惟張保後出復有蕭嵇蘭號香山二梁皮保蕭步鰲皆屬焉而張保又屬於鄭一妻石氏

張保者新會江門漁人子年十五隨父捕魚遇鄭一為所擄鄭一嬖之未幾使為頭目鄭一溺死石氏領其眾賊謂

之鄭一嫂石氏與保通使領一隊保事石氏甚謹每事稟命而行保日事劫掠其黨漸眾鄉民貪利者接濟酒米貨

財計其值而倍之有強取者立殺以故米糧火藥皆不匱

靖海氛記十年春正月長甯賊陳傳俊與關亞璫糾賊千餘犯龍門諸生李錫韜譚士瑛廖羽成等督率士民悉力堵禦設計破之

龍門志

先是傳俊以亞璫有妖術結為死黨高明峒民被其所惑

從之者衆遂謀亂正月二十日聞賊勢猖獗錫韜與士瑛羽成謀曰縣主不在署守城兵不滿五十賊至將何以戰守因募壯勇千餘又勸各舖戶捐米得二百六十餘石二十三日署守備胡佐朝率兵三十二名壯勇千餘人赴城北堵禦甫至笏竹凹而傳俊亞殫已統羣賊蠶擁而來佐朝恐不敵急策馬奔回閉城錫韜等率壯勇及居民守陣日暮賊至許屋橋七星樓然大礮擊之擊大旗賊卒中礮死亞殫傷股落馬賊仍冒死前攻東門城內婦女皆登陣以輒石擊賊三鼓守陣者擲火城下盡焚賊火藥又探聞縣官由龍華率壯勇回城遂大潰生擒賊黨四十餘亞殫匿草莽間為鄉民搜得緹入城二十四日知縣師保元始回署二十六日廣州府知府福明叅將張汝翼領兵至並

率壯勇前赴高明峒搜勦賊黨傳俊尋亦被獲闔邑遂安

龍門志

二月有黑氣在前紅氣在後起於新安城西南海上至城東北而去暴風飛捲路上行人有忽高丈餘昏迷不知人事面如火燎者

新安志

夏五月初十日海賊李英芳劫擄新會良則冲新前村等處

新會志

六月海賊焚劫香山港口

香山志

八月壬寅夜郭渡帶率船三百餘由獨子洋入攻大黃圃鄉人力戰禦之明日棄大船三遁復掠港口

香山志

新會南坦村民譚某一產三子

新會志

十一月海賊譚亞辰伍亞賢李英芳等率黨四百餘投誠

新會志

廣州府志卷之二十一

香山饑香山志

十一年二月二十二日雨雹如拳如斗如牛大者重數百斤

三月香山新會饑香山志 新會志

五月新會地震新會志

十月三水西南火燬舖戶一百餘間三水志

十一月海寇復至港口官兵及緡船擊退之香山志

賊掠三水大路墟三水志

時有鄰境海盜譚亞四等駕紅頭船由東江至西南入思

賢滘劫掠大路墟從西海下逸三水志

十二年春二月香山新安兩雹香山志 新安志

夏海寇攻虎山瀝涌等鄉鄉人禦之互殺傷不遭掠香山志

增城大水增城志

六月海賊圍香山磨刀礮臺不克采訪

六月丁丑夜賊船百餘圍磨刀礮臺守臺把總遣兵告急

時右營守備李海能領左翼鎮師船十六艘到縣知縣彭

昭麟令守芙蓉沙口即乘夜與署都司余時高領兵由小

道馳往五更抵磨刀發礮擊之神灣聞號令亦對岸夾擊

碎船二稍却李海能復自芙蓉沙上流直逼賊遂竄多落

水死者香山志

九月奉大府檄緝拏南海荔支園會匪香山志

初荔支園賊譚四葉高傑李乃文等結三合會分東西中

三路令其黨勒各鴨埠基圍掛號銀視所出貨為等差紙

票蓋圖章儼若符信西路則順德之高讚桂洲馬甯是也
以葉高傑為首東路中路邑之橫門蕉門大黃圃潭洲黃
角順德之容奇及番禺新安等處是也以李乃文羅成才
為首至是捕之

香山志

十三年春大雨水溢

清遠志

二月清遠雨雹

清遠志

秋七月英吉利兵船駛進內洋

采訪冊

英吉利兵頭都路釐率千人駕戰艦徑達香山澳挾逐西
洋人奪濠鏡居之聲言粵中大吏許其分估西洋船額總
督吳熊光遣知廣州府事福明往諭都路釐與明爭禮各
不相下嘗領番兵百人詭服持械至廣州城下迫見總督
總督拒不納仍令明等與會于十三行都路釐桀驁不屈

總督益堅壁自固水陸戒嚴礮石之聲晨夕不絕者四閱
月乃令嚴禁內地不許運出薪米絕其日食都路釐令兩
舸薄魚珠主客相持官軍四集人心惶恐後得

俞旨自度無所得利乃稍退出旋復搜括在港諸番責賠兵

餉始遠去

彙編

英吉利來巡船三日家賁曰拉曰簡敦故事英吉利護貨
兵船泊十字門外其年貨船未至即給言護貨既而兵頭
度路利即都路釐之轉音揚言佛蘭西侵據西洋國主遷于亞美
利加洲英吉利與西洋世好慮佛蘭西入澳滋擾因以兵
力來助其實英人敗于安南覆其七艘故以餘艘抵粵駐
粵大班喇佛乃唆令占澳門為補牢計澳夷不敢較也然
英人懼中國不從亦未敢顯言據澳兩廣總督吳熊光飭

洋商諭大班俾兵船旦夕回帆度路利不聽乃下令封船禁貿易斷買辦移駐澳左翼碣石二鎮師船五十紅單船三十六自虎門晉省防護方遷延集議間而英吉利復續來兵船八遂駛三兵船入虎門進泊黃埔越三日總督飛章入告旋奉抗延勦辦之

諭旨各路官兵雲集距澳門八里之關關二十里之前山寨復留重兵防守英人大恐慮其貿易之停也始議遷賄澳夷約以番銀六十萬圓犒軍澳夷輸欵英吉利之兵總悅大班乃具狀歸誠請給買辦復開船以入埔入澳英兵陸續回歸國熊光許之上以熊光辦理遲緩又未親蒞澳門耀兵威雖開船在英兵既退之後而許其開船則在英兵未退之先

嚴旨切責下部議奪職

海國圖志

二十一日賊船數十在海面肆劫右翼鎮林國良率師船與

賊力戰死之

采訪冊

七月虎門鎮林國良率師出海剿捕張保謀知官軍至預伏戰艦于別港先以數舟迎之佯敗國良覘其舟少以二十五艘追之及孖洲洋賊舟遽合繞國良舟三匝自辰至未國良不能出致死奮戰保立陣前國良發巨礮擊保其彈子及保身而瀉眾驚以為神未幾賊逼國良舟保先鋒梁皮保先飛過船眾蜂擁而過國良率軍士苦戰竟日殺賊無算日將晡賊發礮擊碎我舟軍士落水死者不計其數被賊搶去十五舟保欲降國良國良切齒狂罵賊以刃刺之遂死時年七十

靖海氛記

海寇二十餘艘復至港口官兵緝船擊退之香山志

八月恭將林發剿海賊於阿娘鞋官軍失利采訪冊

發提師出海與賊遇官軍見賊眾懼欲逃賊尾之及阿娘

鞋回舟擊賊賊稍却適風色不利賊據上流放礮我軍力

不支遂失六舟官兵死者數十人靖海氣記

十一月新會江門埠災燒舖戶一百四十餘間新會志

十二月饑新會志

三水土賊蛇王長等焚劫村民次年署都司張仁率兵擒之

三水志

十四年春廣州饑采訪冊

二月海寇復圍香山磨刀礮臺香山志

提督孫全謀擊海賊於萬山破之再戰敗於廣州灣采訪冊

提督孫全謀率米艇百餘號出海剿捕偵知賊聚於萬山

乃分船合圍而進賊恃眾不備我軍士薄之大呼奮擊殊

死戰又以火藥擲燒之斬賊無算生擒二百餘人時紅旗

方聚于廣州灣全謀欲以驟勝之兵掩其不備鄭一嫂先

令張保率十餘舟迎拒而潛合梁皮保抄出吾後我軍方

分兵鏖戰忽蕭稽蘭蕭步鰲率數十舟從左右夾攻陣勢

遂亂鄭一嫂復以大隊衝入官軍遂不支失去十四舟靖海氣記

氣記

五月初八日海賊突入甘竹灘過九江沙口轉劫傑洲十一

日出海道經新會長沙亦焚劫舖戶擄去男婦百餘人靖海氣記

張保率商船數百闖入內河至九江之東南方越旦卯刻

先劫對河之鶴山傑洲等地方已刻回劫九江之沙口用

火焚之屢焚不焰俄有廣西穀船自上流來者鄉人止之不信駛至沙口為賊得賊飽食氣益張窺窬桑園圍必欲滿載而去然賊放礮居人即以圍護身無所損從圍內礮打賊船屢發屢中相持數日賊遂起碇去至順德之甘竹鄉焚劫墟場停泊二日轉新會香山而去南海志

海賊將犯新會署知縣沈寶善親往江門堵禦賊轉入沿濬口寶善衣短後衣督紳士軍民悉力禦之賊不能犯遁

長沙新會志

海賊劫新寧張良邊諸村擄雷成等男婦九十六人新甯志

六月左翼鎮總兵許廷桂剿海賊於桅夾門遇害采訪冊

廷桂之提師出洋也駐師桅夾門適數日大雨連綿未遑解碇初九晨張保以二百艘猝至直衝廷桂舟時錨碇未

拔猝遇賊不能脫將士皆失色廷桂大呼曰爾等皆有父母妻子宜奮勇擊賊我荷朝廷厚恩脫有不測惟以一死報國耳軍士皆感激奮力死鬪廷桂擊其一頭領總兵寶斃賊稍却俄而賊先鋒梁皮保躍過舟官兵披靡廷桂見勢不敵遂自刎官兵落水死者無數失二十五舟靖海氣記時舟師六十艘皆最精銳者與戰風不利賊乘勢轟擊追抵芙蓉沙河小舟大擁不進且多倚岸兵無鬪志棄船走許廷桂被殺逃兵至石岐奪食是日賊連劫第一角寮后等村村民擊退之仍屯大浦村前聲言劫石岐十二夜乘潮至濠涌鄉人禦之礮斃賊十餘人稍退屯茶園山下鄉人復移礮斃數人而鄉人無一傷者翌日知縣彭昭麟檄官兵及呂船與鄉人水陸夾攻自辰至申賊披靡去香山志

總督百齡令沿海州縣團練為守禦計龍廷槐敬學軒文集

張保輩賊船數百艘皆恃內地奸民為接濟嘉慶十四年

總督百齡至粵改鹽船為陸運驟封海港商舶不通賊眾

撲岸覓食香山東莞新會諸縣濱海村落多遭焚劫而番

禺順德尤甚廣東海防彙覽

是時武備廢弛當事者止知斷接濟以清盜源於沿海隘

口未及防範其後焦勞策畫勦撫兼施掃淨海氛著功甚

速然當區畫之始論者不能無憾於此見籌海之非易言

也同上

時前巡撫百齡復自兩江總督調兩廣廣人皆曰百青天

來矣父老日擁轅門叩頭泣懇制軍令軍民獻策有以封

港之說進者曰自黃標歿後官軍少有得利者近者林國

良戰沒於馬洲孫全謀失利於澳口二林走竄於娘鞋廷

桂喪軀於桅夾銳氣頓喪兵有畏心乃欲用以剿滅之誠

未見其有當也為今之計惟斷賊糧食杜絕接濟禁船出

海鹽轉陸運俾無所掠令其自斃制軍用其策數月賊果

大困於是謀入內河分三路而入鄭一嫂掠新會等處郭

婆帶掠番禺順德等處張保往東莞等處靖海氛記

海賊郭婆帶率船百餘圍小欖泊第九嘴鄉人戰却之鄉民

蕭世泰等七人遇害賊亦多死者時又有橫檔村禦賊死者

譚靄珍鄧煥章等六十六人香山志

海賊郭婆帶連劫紫泥碧江韋涌林岳石壁等處靖海氛記

三十日海賊張保泊舟順德城外之板沙尾以守禦嚴乃退

采訪

張保既戕許廷桂即乘勝犯香山南北二港復犯新會之外海均不得入遂至小欖登岸焚掠互有殺傷退窺容奇桂洲以備嚴未泊于月之三十夜直泊順德縣城外之板沙尾海面時城中副將王國寶都司陳國寶左右營守備皆奉調在外人心惶遽紳士龍廷槐等捐銀新築碧鑑海礮臺時有官雇繪船在板沙尾堵禦者令其撥三船在礮臺停泊以壯聲援賊船望見守備之嚴數日即駛去順德志

七月海賊劫蕉門香山志

蕉門瀕大海地僻民少初環植笏竹以雜石繚短垣賊弗敢入後漸伐竹毀垣至是賊乘虛搗之黃角人分二路馳救賊遁越二日獲一艘于東涌則接濟者其人鳧水逃殲諸海知縣彭昭麟旋請建礮臺于蕉門香山志

志初二日海賊郭學顯分船四掠至大黃滘繞水師營而去南海志

初四日海賊攻破三善鄉鄉勇同日遇害者五十四人番禺志

初海氛起是鄉瀕海知不免迺練勇修械賊首郭婆帶果以七月朔日至鄉勇拒之三日不能入殺其偽先鋒十人婆帶怒號于賊眾斬一首賞十金賊蜂擁登岸四路夾攻鄉民亦分四路應之有梁科者執旗登山大呼殺賊賊從山後抄入斬其首乘勝追擊生擒麥儒光等四人餘眾紛紛墜山下東路敗賊又自北來梁兆康倉卒發礮礮裂受傷遂被殺黎泰與梁重賓譚錫模靳善昌温和遠黎本伍奮力殺賊無算未幾和遠被擒黎泰與錫模善昌重賓皆死賊擁而進黎翰榮温敬羣守閘登屋乘風揚灰賊以槍衝

其喉皆死北路又敗南路距海遠賊不得進迺併力而攻西黎學榮以礮擊之不中被執吳朝政再發礮甫舉手而賊刃已及斬權長等殲焉賊入村縱火梁兆榮陳京和等十四人皆死之賊大掠三日屠麥儒光等六人以祭亡賊凡斬首皆懸於樹寇退鄉人葬諸鄉內之烏猪岡舊名澳洲岡

建祠祀之

番禺志

海賊張保焚劫馬洲平洲三山等處旋退攻沙灣不能入復乘潮上焚疊石墩入扶閭進攻黃連鄉鄉民礮擊賊船傷其夥黨數人賊遂解退屯橫門海口順德志

十六日海賊劫東莞勞村鄉民力戰敗之采訪冊

賊劫勞村鄉人逆知其來先以巨礮枕要路斬樹木覆之而伏兵隱處以待甫挑戰賊見其人少登陸追之將近偽

為發礮狀乃藥線焰而礮不響如是者三賊意其偽麾眾

盡上鄉民奔入隱處賊遞近發礮擊其百餘人斃餘眾擒

斬幾盡奪其座船一長龍二靖海氣記

二十七日海賊張保擾新塘邑令柏春主簿沈志仁遊擊唐

文才率兵丁民壯禦之是夜寇遁去增城志

二十九日海賊劫東莞到涪殺幾及千人靖海氣記

八月賊張保焚劫大門墟龍圍大江小坑嶺山茶坑諸村鄉

勇葉宜盛陳敬裕九人死之新甯志

初五日海賊張保劫番禺新造鄉不克采訪冊

張保船二十餘艘泊沙路四沙新造鄉人望見之遷婦女資財於岡尾社十八鄉初六日賊登岸分二隊一由墟口入墟一由涌尾社入村其入墟者方破閘開口為醬園舖

民從瓦上推醬缸擊之勢猛地滑賊多死未幾十八鄉人至賊不敢進又有人杉排後街劫當舖者鄉人羅瑞堯鄔蛟善技擊斃賊十餘人十八鄉來援賊乃退其入村者至涌口社亦為鄉人敗走鄉勇黎執追至社外賊回擊之死焉是役陣亡者一人而已鄉人復追賊殺百餘人賊焚海岸竹排而去番禺志

二十二日海賊張保劫順德陳村不克采訪冊

先是賊攻橫岸林頭乾滘諸村俱不能破至是舟泊陳村鄉人預知賊至齊出堵禦賊發礮傷鄉人鄉人亦發礮應之礮架高不能傷賊賊率五百人遽進鄉人戰敗退入舊墟賊為濠所阻不得越遂焚馬基頭廬舍二十餘間翌日賊大隊復至鄉人戰不支適鄰堡赤花率鄉勇千餘人助

戰賊乃遁去計斃賊數十人鄉勇死者八人靖海氣記

八月二十日張保率舟三百劫沙亭擄男女四百餘人靖海氣記

二十五日海賊張保攻瀾石紳士霍永清等死之焚民居四百餘南海志

張保與婆帶分道焚掠婆帶往焚三雄奇劫黃涌茶涌等處保進劫北海到佛滘獲穀數萬石廿五日入西滘至是率舟直上瀾石海口先有米艇五隻為本鄉防護官軍見賊至盡逃保驟奪之遂進擊村前監生霍永清獨仗鐵杆率數十人拒戰殲殺甚眾明日或導之從村後掩人而聯艘以攻村前永清腹背受敵再中礮仆賊到其首棄之去同死者梁亞近陳亞昌郭亞二張廣朋鄧昭明事聞大吏遣僚屬弔臨鄉民特立廟春秋致祭焉采訪冊

二十七日官軍邀賊於金岡無功而還采訪冊

遊擊林孫率兵船四十巡河邀截至金岡在沙灣海日已暮駐

兵紫泥張保退返沙亭是夜賊舟續至孫懼不敵疾趨碧

江賊欲躡之不及遂屯沙亭靖海氣記

謹案番禺菱塘司有沙亭鄉無劫掠事據碧江紫泥

相近是沙灣司地而此地實無沙亭恐誤

二十九日海賊張保焚劫乾涸燬房屋數十間擄男女千餘

人采訪冊

賊以小舟入裏河鄉人發礮傷賊二人賊怒以大舟環繞

村前分數路而進鏖戰於林頭渡口拳師周維登奮前傷

賊十餘人賊圍之數重其女聞變急揮刀冲入賊攢刃刺

之父女遂同日遇害鄉人既敗走斷橋以拒賊後路賊發

烏鎗擊之泗水渡濠登陸相殺死傷無算沿途劫掠衣物

財帛不計其數并擄男女一千一百四十人采訪冊

九月海賊張保復焚劫大門墟鄉勇李保鄭亞斗麥亞晚陳

上贊黃阿秀六人死之新甯志

十三日官軍邀賊于沙灣我軍戰失利采訪冊

提督孫全謀率戰艦八十往沙灣邀截賊知之十四夜招

集各船赴沙灣自初更發礮互擊至明日巳時乃罷官軍

失四舟守備梁滔自度不能脫曰吾不可受賊刃遂燒火

藥櫃自焚死官兵亦多死焉

海賊張保焚劫香山大黃圃鄉武舉何定鰲率鄉民力戰死

之采訪冊

張保率船三百餘艘攻大黃圃東南知縣彭昭麟撥繪船

十四護西北癸未賊以紅旗由鵝頭山踰尖峯嶺而下以黑旗由西北河田進鄉人擊之賊多死傷忽風轉潮上船不能抵賊奪船破柵時淇澳司張永津奉檄守禦僅以身免鄉人既首尾受敵退隘堅守沿海墟場焚劫殆盡武舉何定鰲等四十八人遇害

香山志

十月初三日內河羣賊盡退出港口

采訪冊

石氏之令賊入內河也自乘大艦浮于海而據守港口防官軍掩襲時有夷船三艘歸其國遇之賊擊獲一船殺夷人數十其二船逃回遇香山知縣彭恕率所募民船百艘夷人與約同擊賊又自雇夷船六艘覘石氏舟少往圍之石氏偃旗息鼓使長龍船入內河呼張保出港合戰十月初三日內河賊船盡退夷船與保戰大敗眾船盡逃夷人

憤甚稟香山縣願以夷船出戰彭昭麟允其請遂點閱西

洋夷船六隻配以夷兵供其糧食出洋剿捕

靖海氣記

提督孫全謀圍海賊張保于大嶼山保乘風遁出外洋

采訪冊

海賊張保避風于大嶼山赤瀝角赤瀝角惟東西通海可截而殲也香山知縣彭昭麟偵知之令漁戶陳敬裕等以繪船截其東口檄蕃船三助之時賊別隊方攻劫他處聞急回救彭昭麟復馳請提督孫全謀移師截其西口賊數百艘盡困港中未幾東南風作彭昭麟請沈二巨艦阻賊西遁之路孫全謀堅不從又請以火攻從之然火船小而少賊拒以木不得近彭昭麟以事多掣肘慮其終變馳請總督百齡視師是夜賊冒死乘風西出孫全謀麾師船長列一字避之賊遁去蕃船繪船追之不及翌朝百齡至則

無濟矣香山志

十一月官軍剿賊於南澳敗績采訪冊

賊破圍後孫全謀仍勉飭將弁追剿十一月初五日偵知賊在南澳即率米船前往搜捕賊將船一字排列及官軍到乃揮船從旁環抱將以圍我官軍也官軍亦分船八十號抄出其後以綴之我軍殊死戰燬賊船三隻賊乃遁我軍不復追以其遠去也賊忽反船來攻我軍防備不及賊擲火燬我船二隻又奪去船三隻靖海氣記

十二月郭婆帶降采訪冊

張保之困於赤瀝角也郭婆帶在潤洲保遣人求援婆帶不往救保大怒及突圍而出與婆帶相攻保敗婆帶具呈詞於官乞降總督百齡許之婆帶改名學顯總督以敗張

保功奏授把總職靖海氣記

二十七日海賊張保劫雞洲盧呈瑞率鄉民力戰却之采訪冊

時副將盧呈瑞適帶兵在雞洲堵禦二十八日賊眾登岸呈瑞令烏鎗居前躬自押陣以鄉勇綴陣後助聲勢礮斃其頭目數人翌日謀再戰賊黨畏怯張保大犒夥黨逼令登岸我兵復以連環鎗抵禦傷斃無算呈瑞周視形勢令於海旁築土堞以避礮又村前有水閘悉用石堵塞賊望見知不能破越歲二月二日遂退屯潭洲是役也鄉勇陸進高蘇強盛李長義以禦賊死凡三人采訪冊

十五年正月饑斗米錢四百新會志

二月初十海賊毀虎坑水柵直入新會長沙燒舖戶二百二十餘間新會志

時新會沿海村鄉燒劫甚眾九如鄉及慕山死者擄者尤多又九如鄉男婦爭渡逃難者溺死四十人新會志

十四日張保等劫掠新會三達東頭等處時鄉勇梅岡蘇玩學碩叟李德聯東頭李基昌謝永財俱被賊傷斃小岡村鄉勇救援傷賊數十人賊勢始沮新會志

十五年二月辛卯海寇攻香山長沙埔村人奮擊之殺賊十餘人賊知不能入焚沿海民居六十二戶而去鄭宏德鄭四蕭應朝蕭任高曾天富鄧啟日蕭作輝林世善梁勝廣九人

遇害香山志

海賊張保流劫新甯蘇渡旺北桑園諸村鄉勇甄參歲甄業

蒼吳隆壯吳裔羅死之新甯志

海賊張保降宋訪冊

石氏見郭婆帶降而得官乃揚言曰紅旗亦願降紫泥司巡檢章予之命周飛熊往問之周飛熊者業醫于澳門知賊情既見張保使艘舟虎門外沙角以聽命保許予之報總督總督命予之往探虛實石氏設酒食相待予之留賊船一宿歸言賊誠心歸命制軍再令偕彭恕往議投降事宜張保請留船數十殺賊自贖予之復命總督曰彼懼我誘降以執之也吾當親往諭之使周飛熊先告之乃駕一舟偕彭恕章予之直至賊所賊列船樹旗鳴礮以迎左右皆失色總督夷然自若張保與石氏鄭邦昌梁皮保蕭步鰲等駕長龍出制軍命之見保等匍匐登舟乞命總督限三日條列船艦器械盡數交割保等唯唯而退適番舶揚帆入虎門賊大驚謂官軍陰合夷船襲已遂遁已而知

其誤石氏欲到省為質訴誤遁之故然後舉眾降予之飛熊以招降不成懼獲譴亦往勸之石氏偕予之到省見制軍總督乃至香山芙蓉沙受降令願留者分隸諸將出海捕盜不願留者散歸未幾餘賊盡平海氛遂靖靖海氛記

五月賊首吳知青降新會志

秋增城大水增城志

十六年夏四月清遠水溢清遠志

六月八日新會颶風暴雨拔樹壞屋無數新會志

冬十一月三水雞枕山賊劫西南三水志

十七年夏四月新會瀧水塘河村華光廟內砌磚間產琪花兩株高八九寸每株開花一朶一如宮扇一如金鐘日變五色朝白午紅晚轉紫黑夜深轉青村童折去復生花如初至

十二月中旬始謝新會志

新安東路蝗食稻新安志

十八年夏五月大水決桑園圍榕塞圍延及魁岡大良二圍田木盡淹沙頭圍大欖圍白木灣圍永豐圍均被洪潦冲決采訪冊

饑斗米錢四百新會志

九月香山新會地震香山志新會志

十九年秋八月新安雨雹冬十月大雨新安志

二十年新會潮居六圖河橋里雌雞化雄新會志

香山新會地震香山新會志

二十一年春三月清遠雨雹清遠志

十二月香山地震香山志

是年清遠會匪煽愚民拜會總督蔣攸銛命清遠營遊擊緝拿會匪五百餘名地方始靜

二十二年春大雨雹清遠志

夏五月大水害稼桑園豐岡大良大槎良安碧岸西圍圍基

潰至八月水乃退南海志

六月三水地震三水志

冬十月香山大水香山志

二十三年春正月香山上涌村產一豕二頭一身八足二尾

又是年產一牛五足其一足在尾香山志

三月香山清遠雨雹香山志

夏五月大水坍塌三水大良圍寶早晚歉收三水志

秋九月新會大風暴雨壞廬舍新會志

二十四年秋增城大水壞民居上下二都尤甚冬米貴增城志

二十五年正月清遠大風壞廬舍夏大旱四五月蟲食山松

清遠志

秋七月龍門天裂有聲如雷龍門志

三水大水三水志

署香山縣知縣宋如楠捕打單賊香山志

時港口象角小欖等處所在皆有大府檄嚴辦遂大捕之

獄滿不能容編柵於儀門外為監房兇焰稍熄香山志

道光元年大有年新甯志

夏五月西潦至香山志

六月香山谷鶴村西北有聲如風雨拔田中茅廬擲數百丈

稻粒脫盡蒙仆地如受櫛香山志

二年春三月龍門雨雹龍門志

九月夜城外西關火亘三日夜焚民居一萬七千六百餘間南海志

南海志

香山疫香山志

三年新甯地震新甯志

香山疫香山志

夏四月香山場五色雲見香山志

五月西潦大至七月始退早晚稻失收香山志

冬東莞屬草尾垂珠纍纍如小粟色青白瑩潔可愛明年不復見采訪冊

復見采訪冊

十二月香山地震香山志

四年春二月香山河雨雹香山志

清遠水溢禾稼歉收清遠志

四月番禺有龍氣自長洲海面過民居破壞一百二十餘間

樹木皆拔番禺志

秋七月香山地震采訪冊

有流星大如斗光如月自東流西香山志

五年清遠大饑清遠志

冬十一月雨雪三水志

六年春二月清遠雨雹清遠志

香山雨沙香山志

夏四月香山甘露降香山志

八年春三月清遠雨雹清遠志

九年春旱采訪冊

廣州府志卷八十一

夏五月大水害稼南海志

十年大旱早禾失收三水志

秋七月香山地地震香山志

十一年饑南海志

冬寒甚有雪南海志

十二年春正月香山雨雹采訪冊

夏旱南海志

四月十六日有流星隕於龍門采訪冊

一隕馬嘶水口許姓村前芋田未墜之先聲若震雷仰見

一物色甚黑從天而下大如斛旋轉入田土人急掘之約

二尺許得一石色類羊肝通身皆凸重數斤嗅之腥一隕

油田黃坑石方而長重二十餘斤一隕橫槎魚爛龍門志

清遠大水漂沒田廬無算清遠志

十月南門災南海志

冬寒甚順德志

是年香山三合會起官軍縛擒其魁眾始定采訪冊

香山四大都三合會萌葉煽誘左步頭村二百三十餘人

附貢阮森榮議禁之羣匪反喧呶森榮乃密謀諸父老聯

保甲西江尾龍穴頭村匪附從行劫森榮率眾擒其魁十

二人白官通詳大府檄行嚴緝斂戢者十餘年采訪冊

巡撫朱桂楨毀英吉利新建馬頭采訪冊

英吉利蠻酋於十三行海濱以巨石盤址構基設柵置守

桂楨一日偕權使某往降輿周視怒召洋商某問曰此何

為者答曰洋人馬頭也曰皆若輩嗜利所為耳速集石工

毀之蠻酋無敢譁者蓋素服公之廉介而敬憚之耳

南海續志

十三年春三月番禺雨雹

番禺志

夏五月大水害稼圍基潰決幾盡

南海志

秋七月大雨城中地卑者水深丈餘高者亦四五尺壞屋溺人無算居民避居于粵秀山及城垣上者甚衆十旬水始退

晚禾弗克蒔民大飢官設局勸捐賑卹

南海志

十四年春二月十日龍門雨雹大如雞子

龍門志

夏五月大水害稼基圍多潰

南海志

三水有蝗

采訪冊

秋八月英吉利兵船駛進內河

采訪冊

舊制番舶至口先報總督監督委官驗無禁物然後給牌照入至黃埔起銃礮開槍互市道光十四年夏英吉利兵

官律勞卑來主船同行有兵船二寄碇外洋其貨船不赴澳請牌照即入口英會處省館輒效中國文字投書督府總督盧坤擲還之下令封貨船不與通市八月五日二兵船忽乘南風潮漲駛入內洋越過虎門鎮遠沙角橫檔大虎各礮臺直抵黃埔守臺官兵不能禦乃然空礮以懼之而英船竟發巨礮實鉛丸損我礮臺人心震怒於是上流用大船十餘每船載大石十萬觔積沈水底繫以鍊鹿大纜復結筏水面以阻之集柴薪草束大小船數百集舟師數十兩岸設營柵集士卒數千其戰艦仿懸簾法濕絮褥以禦火器檣楫如林戈矛森列英人大懼請退出不許律勞卑請給小船下澳不許番商數千人合詞乞命乃許之律勞卑既出慮歸國以生釁伏法遂仰藥死

盾墨

十五年夏番禺蝗番禺志

大旱祈雨閉南門番禺志

六月新會颶風壞禾稼舟楫淹斃人口甚眾新會志

冬十二月二十二日大雪漫天如飛絮積地四寸餘自是連

年大熟斗米百錢南海志

十六年夏四月十九日酉刻香山西南角白氣一條向空飛

上臚膊有聲漸從北方而沒新會志

冬十月十四日新會地震新會志

十七年春三月龍門大水壞田廬龍門志

夏五月二十六日午新會龍見自東而北潛於圭峯之龍潭

新會志

三水有蝗三水志

十八年東莞民生一子人頭鯉魚身東莞志

十九年春正月欽差大臣林則徐至廣州查禁鴉片煙二月

圍英吉利領事義律等於公司行令繳鴉片煙土二萬二百

八十三箱焚之于澳門尖沙嘴設官局于長壽寺三賢祠收

內地烟膏及吸烟具紳士設局大佛寺並往各鄉收繳番禺志

鴉片烟在康熙初以藥材納稅乾隆三十年以前每年不

過一百箱嘉慶元年以嗜者日眾始禁之嘉慶末每年私

鬻至三四千箱始積澳門繼移黃埔道光初嚴禁復移於

零丁洋之躉船洋船至皆先以鴉片烟寄躉船始以貨入

口凡閩浙江蘇商船買烟者從外洋販運粵人則在口內

議價而後運入始躉船不過五艘其烟不過四五千箱迨

增至二十五艘烟二萬箱則在道光六年總督設巡船之

後前此定例互市以貨易貨不準紋銀出洋每歲英商補內地貨價銀錢四五萬員其後英商求準貨船洋銀餘剩者帶回十之三於是銀之出洋者無算十二年總督盧坤裁巡船而水師積習已不可挽十七年總督鄧廷楨復設巡船水師副將韓肇慶專以護鴉片烟漁利而每年入口者遂至四五萬箱大理寺卿許乃濟曾任廣東道員奏請鴉片煙照藥材收稅十八年鴻臚寺卿黃爵滋奏請嚴禁鴉片煙以防紋銀出洋至是

上命湖廣總督林則徐為欽差大臣赴廣東查辦十九年正月抵粵英人查頓聞風先竄巔地隨其領事義律由澳門至省城夷館林則徐遣兵役圍守之令繳零丁洋所泊二十五船之烟土義律具稟遵繳其往各洋之烟船亦回粵

共繳鴉片烟二萬二百八十三箱林則徐鄧廷楨往虎門驗收每箱賞茶葉五斤奏入

詔令烟土解京則徐力言其弊始諭令即在海口銷燬毋庸解京則徐會同督撫於虎門監視銷燬就海灘高處開池浸滷投以石灰頃刻騰沸夕啟滷洞隨潮出海夷艘寇海記

十九夜月色赤如血二十夜亦如之采訪冊

六月新會潮陽都黃村陳章與妻一產三子新會志

秋九月英吉利燬虎門戰艦揚帆去南海志

林則徐令進口夷船均應具結有夾帶鴉片者人即正法船貨沒官彌利堅諸國皆遵具結義律由省城往澳門稟請將本國貨船泊卸澳門則徐不許義律遂不受所賞茶葉不肯具結而五月內復有尖沙嘴洋船水手毆斃村民

林維善之事則徐諭義律交出夷犯抵罪義律拘訊黑夷五人未獲正犯懸賞購之七月則徐與鄧廷楨示禁絕薪蔬食物入澳門義律率眷屬及在澳英人五十七家寄居尖沙嘴貨船招海外夷埠兵船二艘來粵又擇三大貨船赴九龍山假索食為名開礮擊水師船泰將賴恩爵揮兵發礮擊翻雙桅夷船一杉板小船二英人所雇呂宋躉船逗留潭仔售烟者亦於八月為水師攻燬義律請澳門西人代求願將躉船奸夷盡遣回國其貨船亦願具結如有夾私者船貨充公林則徐必令書人即正法四字且責繳凶犯旋有英國貨船遵式具結九月晦入口義律阻之且稟稱無攻燬尖沙嘴師船事水師提督關天培以未獻凶犯擲還其稟時師船五艘在洋彈壓夷船發礮來攻關天

培開礮應之擊斷夷船頭鼻夷船恐官軍乘夜火攻又水泉皆下毒無可汲飲遂出外洋夷艘寇海記

十一月奉

旨不准英吉利通商番禺志

二十年夏五月英人大小兵船十二火輪船三先後至粵泊金星門其餘泊老萬山外林則徐以火船十艘每二艘緝以鐵索乘風潮攻之焚其杉板小船二英人自是不敢近海口

夷艘寇海記

自封港後英人貨船至者二三十艘皆不得入口人人懟怨十一月義律復遣人稟言在粵辦事多年自後請照大清律辦理而無違於本國之法乞仍許英人回居澳門俟國王諭至即開貿易林則徐不許時洋人貨船十餘艘及

續至之船寄泊外洋不肯去而粵洋漁船蠶艇貪其厚值給以薪蔬且買鴉片趨者如鶩則徐旋奉

命總督兩廣與水師提督關天培謀招募漁艇蠶戶攻之於長沙灣燒奸民運烟濟夷之船義律回國請兵其國頭目

伯麥率兵船至夷艘寇海記

林則徐使人刺探夷事翻譯夷書知洋人藐視中國水師而畏沿海梟徒及漁船蠶戶於是招募丁壯五千又於虎門之檔嶼設鐵練木筏橫亘中流購西洋各國洋礮增排兩岸又雇同安米艇紅單船拖風船為戰艦親赴獅子洋校閱水師下令每殺白夷者賞銀二百員黑夷半之斬英酋義律者銀二萬員其下領兵夷目以次遞降獲兵船者火藥礮械繳官餘盡充賞於是夷船之漢奸皆為洋人所

疑忌盡遣去澳門之西虎門之東皆有兵嚴守夷船至粵

旬月遂竄赴各省夷艘寇海記

七月

詔以琦善為欽差大臣赴粵查辦夷務采訪冊

時英酋伯麥及義律以五船赴天津投書乃其國巴里滿

衙門寄大清國宰相之詞一索貨價初次夷書尚不敢顯言煙價以貨價為名

後乃顯言二索廣州廈門福州定海上海為市埠三索敵

體平行四索犒軍費五不得以外洋販煙之船貽累岸商

六盡除洋商浮費直隸總督琦善奏聞時洋人兵船未北

上其意惟求通商

詔以琦善為欽差大臣赴粵查辦革林則徐鄧廷楨職仍留

粵番禺志

十月欽差大臣大學士世襲一等侯爵兩廣總督琦善至廣

州探訪册

十二月十五日洋人攻沙角大角礮臺副將陳連升戰死同上

連升久歷戎行夷船礮攻其前而漢奸二千餘梯後山攻

其背連升於後山埋地雷機發轟死數百人賊後隊復擁

而上我兵以扛礮前後殲賊二三百而火藥已竭賊火輪

三板船又遠赴三門口焚我戰艘水師兵潰連升暨其子

陳舉鵬俱戰死夷艘寇海記

二十一年春正月有

旨調四川貴州湖南江西兵赴勦同上

總督琦善會英酋義律於虎門外之蓮花山番禺志

琦善許償烟價銀七百萬員而英人必欲索地迄無成議

番禺志

二月初五英人攻橫檔虎門礮臺提督關天培死之初七日

攻烏涌土礮臺湖南鎮總兵祥福死之夷艘寇海記

時調各省兵祥福以湖南兵千餘至琦善派守烏涌烏涌

土臺無礮祇恃杉排截江祥福至曰此死地也連夜募人

在田中開溝如棋局形溝深足藏兵溝中間留土壑左右

有級伏溝者登而放鎗前下後上可連環不絕是日洋船

至發一礮見岸上無人即上岸溝中兵咸登鎗斃英兵多

名洋船退後進者亦為鎗擊斃凡殺二百餘人而我軍火

藥已罄於是粵兵先走湖兵且戰且走後阻小溪死者多

人祥福亦溺死起尸時尚手搏一英人以手入其喉相抱

同溺云事聞祀昭忠祠采訪册

初九日失滘洲土礮臺初十日失獵德礮臺采訪

十二日撤奇石鄉土礮臺官兵回城廣州府余保純往黃埔

議款未成番禺志

十三日參贊大臣湖南提督果勇侯楊芳至廣州夷艘寇海記

十四日失二沙尾礮臺采訪

二十一日失大黃滘口礮臺洋人遂擾掠南石頭東墾采訪

時英人別隊援香山者亦於二十一日駕火輪船乘早潮

自南路入破湖州礮臺殪守臺勇連破沙涌礮臺登沙涌

渡頭村入民家肆淫掠村人怒拒而擊之雷兆成等十八

人戰死濠涌守者棄礮臺逃歸采訪

二十四日官兵在鳳凰岡擊退英船南贛鎮總兵長春被傷

番禺志

二十六日英人攻鳳凰岡土礮台連失西礮台永靖礮台海

珠礮台遂入公司行監旗番禺志

廣東省河廣闊惟東路之獵德二沙尾西南十五里之大

黃滘稍狹可扼守楊芳使總兵段永福率千兵扼東面十

餘里之東勝寺為陸路三面咽喉其地距河五六里不能

扼賊水路也又使總兵長春以千兵扼大黃滘後五里之

鳳凰岡惟築濠壘橫木筏而未沉石下木椿其獵德二沙

尾雖沉船塞石而無兵礮守禦英酋初讐楊芳威名使人

持書往鳳凰岡議欵沿途探水總兵長春受其書送城中

待報英人徧歷營壘歸報無備於是分道深入破鳳凰岡

營進攻東西礮臺盡扼獵德大黃滘兩咽喉矣時琦善已

革大學士巡撫怡良復以英酋香港偽示奏呈語絕狂悖

上震怒命逮琦善來京夷艘寇海記

二十七日英人求通商暨准各國照常貿易采訪冊

英人知

朝廷震怒恐貿易永絕各國商船罷市久亦皆咎英人乃于

二十六日託彌利堅國夷目與洋商伍敦元投書言不計

別情但求照舊通商如有私夾鴉片烟船貨入官蓋琦善

所許之烟價香港皆不敢求楊芳諭令退出虎門義律言

俟奉通商之旨兵船乃退是月楊芳奏請先開港脚洋人

互市奉

旨不許時定海夷船亦至廣東共五十艘半泊香港半入虎

門徧樹幟出賣鴉片靖逆將軍奕山將至以各省兵礮攻

具未集駐韶州以俟夷艘寇海記

二十八日洋人開船賣貨西據大黃滘礮台東據獵德礮台

任民船往來居民漸復采訪冊

三月林則徐以四品頂戴往浙江會辦夷務采訪冊

二十三日靖逆將軍宗室奕山奏贊大臣尙書隆文新任總

督祁墳皆至廣州夷艘寇海記

夏四月初一日燔英吉利戈船弗克南海志

時分三路攻英船一屯西礮台外出中路一由泥城出右

路一屯東礮台出左路日暮出城先用四川餘丁充水勇

者四百廣州水勇三百乘小舟分路夜伏聞礮齊起破其

二桅大船二杉板小船五義律自夷館登舟竄免甫黎明

而英兵大集反乘順風來攻官兵退走英人焚泥城所備

木筏材料及油薪船三十餘艘夷艘寇海記

是時英人方據省河且攻具未齊所募福建水勇千人未至近募香山東莞水勇三千亦未集楊芳不欲浪戰奕山初至亦然之既而欲僥倖一試遂不謀於楊芳突攻夷船

夷艘寇海記

英人焚新墩石公祠金利埠及河南洲嘴采訪冊

初四日英吉利兵由繪步登陸據北門外各礮臺南海志

義律投書約詰朝大戰乃環攻城東西南三面奕山派重

兵于東南二路西北泥城後路無守備於是天字礮台四

方礮台及泥城皆失守夷艘寇海記

佛山運至新鑄八千觔礮位置不得地勢依山者高出水

面礮架不能運轉各省兵互調分配兵將不相習守天字

礮台者段永福守泥城者副將岱昌與參將劉大忠守四

方礮台者總兵長春天字礮台上八千觔大礮未及發即

為夷兵錮以鐵釘四方礮台者在城北後山之頂俯視全

城國初王師攻圍廣州所築也至是官兵設礮其上其地

距水次十餘里夷自破泥城後繞東而北沿途無兵阻截

至山下者英人百餘而守台兵遽走英人遂于台下築土

城運火藥于是闔城軍民如在窞中而聽窞上之下石矣

夷艘寇海記

英人在西村黃聖塘瑤臺鄉捉人運器物上礮臺大肆淫

掠彌勒寺環翠庵雙山寺地藏禪林流花橋諸處開棺暴

骸番禺志

初七日靖逆將軍奕山等遣廣州府知府余保純出城議款

采訪冊

是時城外之火箭礮彈與四方台上礮聲晝夜不息幸大雨如注其箭彈墜池塘或落空地無一延燎然外城低薄女牆卑於薨脊人無固志初七日英兵遂併力攻城東南隅知將軍泰贊居貢院箭彈皆集櫺臺皆破諸帥避入巡撫署使廣州府知府余保純出城議款義律索軍餉六百萬員烟價在外香港再議限五日內交銀且與將軍約外省兵先出城夷船始退出虎門將軍等皆許之先令洋商出二百萬員餘於藩庫運庫關庫發約會奏請罪泰贊大臣齊慎續至在佛山鎮未列銜而烟價及香港亦皆未入

奏云

夷艘寇海記

初九日英吉利兵分擾三元里等處各村莊民憤甚殲而瘞之初十日英吉利兵大至村民聚眾與戰殆十餘萬擒馘數

百人十一日廣州府知府余保純親往勸諭乃散

南海志

初將軍泰贊之至粵也以為粵民皆漢奸故募水勇於福建官兵捕漢奸有不問是非而殺之者有湖南兵誤姦瘋婦聞人言小兒血可愈遂殺小兒而飲其血會南海義勇為湖南兵所殺遂大譁將報復泰贊大臣段永福慰解始散而英兵亦日肆劫掠及講和之明日英兵千餘自四方礮臺回至泥城三元里民憤起四面設伏截其歸路英兵突圍不能出死者二百餘殪其渠帥曰伯麥霞畢首大如斗而三山村亦擊殺英人百餘奪其二礮及槍械千義律馳赴三元里救應復被圍鄉民愈聚愈眾至數萬義律告急于廣州府余保純是時講和銀送去四分之一又福建水勇亦至倘令圍殲英兵獲英酋以為質令其退出虎門

而後徐與講欵可一切惟我所欲而諸帥竟遣余保純馳

往解勦竟日始翼義律出圍回船夷艘寇海記

十三日四方礮臺英兵下山采訪冊

十六日奕山隆文退屯金山撤回湖南兵楊芳留省城彈壓

隆文於講和時憤恚成疾及抵金山不數日即卒采訪冊

十八日英船盡退出虎門采訪冊

當英船退出時其大船有滯淺沙者各鄉民復思截而火

之官諭止之采訪冊

新安縣武舉庾體羣亦於初四夜半攻英船于虎門一船

俱燬餘船俱遁又佛山義勇亦截擊于龜岡礮臺據上風

縱毒烟以眯其目殺數十人又破其來援之杉板船大帥

先後奏聞

詔責諸將調集各省官兵反不如區區義勇義律出偽示言

百姓刁抗大英今日寬容後毋再犯粵民憤甚回檄詆之

采訪冊

是時南海番禺二縣團勇三萬六千晝夜演練義律偵知

內河有備不敢報復自是知粵市不可復開翻然思變計

矣不逾月遂攻廈門采訪冊

秋七月新會颶風三至新會志

二十二年冬十月三水西南鎮燬舖戶四百餘間河面浮筏

多被延燒采訪冊

十一月

欽差大臣宗室耆英等偕英吉利領事博頂搃由江南先後

至南海志

時定議裁撤洋商分上海甯波福州廈門暨廣州各港口

互市采訪冊

二十三年夏五月十二日大雨水香山金涌新村民居崩六

七十家采訪冊

香山三合會匪再起采訪冊

三合會再起始事者石門甘秀踞老巢嘯聚至於劫掠拒捕者則隆都高明遠周配琚也初起時撰妖書造隱語傳教者曰亞媽引見者曰舅父又曰先生曰升上主文字者曰白紙扇奔走者曰草鞋各頭目曰紅棍拜會曰登壇演戲入會曰出世每拜會亞媽裹紅幘服白衣設五色旗上書彪壽合和同字分布五方從某方來者隸某旗設三重門每門二人持刀作八字形拜會者匍匐人自稱曰仔赤

身披髮跪伏拜斗念三十六咒割指血盟受隱語三角符符內寫參天宏化四字髮辮繫兩線辮結一圈頭目曰天牌圈正額司事曰地牌圈腦後先人會者曰人牌圈左耳後入會者曰人和牌圈右耳俱身披短襖絲帶藍襪銳屣露刃彼此相遇問姓各以洪對或稱三八二十一便知是會中人不肯入教者曰皇仔冒其教者曰野仔曰瘋仔每入會科洋銀一銅錢三百六十日祝壽錢不識其隱語暗號者即被掠采訪冊

甘秀之黨崖口譚仁階半沙許藹佐南萌程建新會梁雄譚紅等於山門葫蘆地上柵太保廟及官塘北山澳門潭仔灣仔等處先後拜會塲黃泥塘大逕山秋七月汪洪戴香來自新會主于高明遠家明遠故綠林魁首周配琚尤

險狠頗通文墨傅之翼設偽文武都督將軍元帥軍師名號在卓旗山舉事蔓延于三角塘中心村庫涌鰲溪朗九曲林一帶附城之愚頑者靡然從之泥塾沙岡尤甚兵役亦多人其會采訪冊

二十四年夏西江水潦大至田多淹沒米價騰貴采訪冊

冬十一月雷龍門志

十二月會匪流劫香山西南暨欖都西海十八沙等處采訪冊會匪攻劫濠頭張家邊鄉人格殺之城市紛紛戒嚴典史王炳元吏目汪政語知縣陸孫鼎以為歲暮常事獲會匪黃孔懷等悉寬責羣匪鄭松等連劫城南徐李劉等家右營捕獲之汪政僅以荷校徇與論沸騰始繫之獄署副將洪名香督兵捕之東南一帶稍斂戢而余太平劉斗之徒

又起蔓延欖都西海十八沙賊船如織紳士控于大府總督耆英巡撫程喬采檄知縣丁澧樟知府倪澧先後至十二月二十日夜賊擾東門之外城中譁達旦倪澧等猶不盡以實告督撫嚴責陸孫鼎始懼小欖司巡檢來城返途次亦被擄駐防小欖千總潘慶救出之捕賊首歐陽從寬等八十餘人采訪冊

二十五年春三月雨絲數日采訪冊

夏四月學政署前失火焚斃一千四百餘人南海志

冬雷采訪冊

十一月有白氣夜見數夜方沒南海志

十二月英吉利求進會城未許南海志

舊例洋人不許入城自壬寅議款後沿海各省多有任其

入城者至是英吉利酋長以為請總督者英巡撫黃恩彤將許之而城內羣議洶洶訛言四起廣州府知府劉潄出行至雙門底上街有觸其前騶者按而撲之百姓大譁謂官但知庇夷而不知愛民也遂羣入知府署中焚毀倉庫掠奪財物布政使傅祥麟親往諭之眾始散識者知粵民之敢於抗法藐官者始於此矣後英吉利酋長亦知人心未肯盡服議遂中止采訪冊

東莞石龍鄉新街演戲失火焚男女四百餘人采訪冊

二十七年春三月順德雨雹順德志

夏五月香山會匪張斗高明遠伏誅采訪冊

時香山小欖賊張斗復聚眾萬餘人設偽官職屯營於下基安塘等處潘慶佯與張斗善餽知其情約五月初八日

舉事馳告縣協帥師至會兵獲張斗等誅之欖屬平周配据先已就擒高明遠至是勢漸蹙然猶挾死黨莫之敢撻有龍眼里人劉光瑤者以禦洋功受六品頂翎素剽悍與明遠埒不相下欲擒獻之以邀賞明遠為族人傷足出入皆八人舁之行光瑤乃潛伏死士于明遠所住豪兔村中夜舉火揭官軍旗幟明遠駭愕伏者出舁之遂獻于縣陸孫鼎將明遠解省寘法續獲其子高世隆孫高解斃之散諸紅棍草鞋紙扇者三合會亂乃定采訪冊

二十八年順德伏波橋旁忽風雨晦冥漁人望見天后廟前有巨魚若鯉化龍騰而去頃刻即晴近處舟楫皆無恙順德志

夏西潦漲南海續志

秋八月初三日狂風大作九月二十三夜復大作覆舟俱以

千計南海續志

香山地震香山志

二十九年春二月英人請入城總督徐廣縉巡撫葉名琛拒之番禺志

英吉利自二十五年復屢請入城官吏皆婉却之至是徐廣縉由廣東巡撫授兩廣總督英酋請具舟相見復申入城之請廣縉答以當奏

聞在籍候補道許祥光等倡率居民數萬鳴鼓羣出巡行街道廣縉與巡撫葉名琛以奉

旨不允諭夷酋其議乃息奉旨封廣縉子爵名琛男爵并

褒諭粵民番禺志

清遠知縣程兆桂堵截賊于濱江白石潭官軍失利清遠志

三月鹽運使徐有壬偕提督祥麟統兵至清遠勦賊獲匪首

鄧南保等磔之戮其黨三百餘人清遠志

夏五月嘉禾生一稔二米南海續志

三十年五月土賊黃毛五鄧十富周阿華等嘯聚英德鐵溪

上下汰等處蔓延清遠潛江其勢甚張八月按察使祁宿藻提督祥麟統兵至清遠祥麟尋卒九月巡撫葉名琛來縣督

師清遠志

十二月土賊黃毛五等竄擾龍門藍田墟等處龍門志

長甯賊首胡黃毛五等聚眾數千擾亂英德清遠等縣知縣侯榮封恐賊犯境集城內外紳士籌捐防堵經費並諭

各鄉紳民團練防守十一月二十六日賊黨周阿華等數

百被官兵追剿由從化呂田竄至地派墟四出擄掠榮封
募壯勇數百分屯要害十二月朔賊移踞上建藍田墟淫
掠益甚初三日鄔村蓮塘田尾羅田石塘等堡鄉民數百
赴藍田擊賊賊分隊出拒放火燒山鄉民不諳戰陣死者
數十人是晚把總江振龍外委宋超等督率兵勇屯茅埔
山初四日會同附城義民三千餘再赴藍田攻剿我兵放
礮轟擊執旂賊先仆連斃十餘賊而兵丁梁裔鄭吉容馮
日等及壯勇梁成潘才李大安陳文梁華等亦戰歿賊殊
死鬪會日將暮振龍等引兵回城壯勇義民盡隨之而返
人心恇怯榮封捐資重賞守城兵勇且與紳士李夢齡力
請守備唐高崑亟遣兵守隘高崑乃飭振龍等領兵馳往
茅埔山堵禦賊聞縣城有備又聞副將趙如勝感恩縣知

縣許錫勳等統兵勇萬數將至初五夜遂竄長甯羊牯田
初七日如勝等至地派墟休兵數日纔至藍田又信宿然
後往長甯追捕此次陣亡壯勇各恤其家并附祀忠義祠

龍門志

南海譚宗浚分纂

南海梁起初校

順德盧乃潼再校

番禺史悠履三校

順德羅

槩四校

廣州府志卷八十一終

